

NSANGU YA LEMVO



Matondo na nge, Mpangi Neville. Mfumu sakumuna nge. Mbote, bankundi. Ya kieleka ya kele bweso na kuvwanda dyaka awa na suka yayi na kisalu ya Mfumu. Mpe mu ke na kiadi mingi ti beto kele na kivinga ve samu na kutula bantu na kati ya mwa dibuundu ya fioti. Ya ke simbaka ve kima ya nene. Kasi beto kele na kyese mingi ti beno kele awa mpe zola kusala munkayulu, na—na kuvwanda na mvibudulu samu na kuvingila beto. Mpe beto ke sala nyonso ya beto samu na kunata beno Ndinga ya Mfumu ya kulutula mbote yina beto zaba mutindu ya kunata Yawu. Mpe ntangu yayi mu kaka . . .

² Mama yayi ya ntwenya vwandaka tambula, mpe yandi vwandaka na bébé ya kubyeka na suka yayi, mpe na yina yandi monaka ti ba vwandaka fioti na nsukinina, mpe yandi tubaka ti yandi ke vingila kaka. Mu me monaka ntete ve kento yayi, kasi mu ke sambila ti Nzambi ke sakumuna yandi mpe ke pesa yandi bumvwama ya kulutula ya balusakumunu ya Yandi na kati ya ntima ya yandi, samu ti yandi vwandaka kuvingila na mvibudulu.

³ Ntangu yayi, ya kele nkwizulu ya ntangu ya mvula wapi ya ke vwanda madidi mingi mpe ya ke vwanda ve tiya mingi ntangu beto kele ya kufuluka na kati ya dibuundu. Mpe beto ke tula kivuvu ti Nzambi ke sakumuna kulutula mingi beno nionso.

⁴ Ntangu yayi mu ke zola kutuba kaka mwa bima awa ntete mu zonga. Ba zabisaka munu ti mu ke tuba na suka yayi, kana Mfumu kuzola, na zulu ya dilongi ya *Mipepe Na Kati Ya Kitembo*. Kasi Yandi sobaka yawu kaka samu na munu. Mu zaba ata fioti ve yina mu ke tuba tii mu banza na mwa minuti fioti na ntuala ya kukwisa na lukutakanu. Mpe mu mekaka na mbala ya zole ntangu yayi na zulu ya yintu ya dilongi yina, mpe mu kondwaka na kuzwa mvutu kukatuka na Nzambi. Mu zaba ve samu na yinki. Mu ke zolaka ntangu nyonso, mutindu beno nyonso milongi awa zaba, ti beno fwana vingila na Mfumu samu na yina beno ke tuba.

⁵ Mazono na nkokila na nzila ya kingenga, mu vwandaka na lubokilu mosi kuna na Arkansas, bantu yankaka zolaka kwisa awa sabala yayi ke kwisa, bawu tubaka ti bawu kuwaka ti beto ke banda lukutakanu mosi na zulu ya *Bidimbu Sambwadi*. Mu me tala kaka *Bansungi Sambwadi ya Dibundu*, na banzenza. Mpe bakala ya yandi ke kwisa na Kilumbu ya ntete samu na kuzwa kisalu ya yandi na Louisville, na yawu yandi lenda sala na yina bawu ke vwanda pene-pene mingi samu na kuwa *Bidimbu Sambwadi* yina. Mu tubaka, “Yina ke baka bangonda tatu, mama. Beto kele ve na kisika awa samu na kuzabisa lukutakanu,

mpe nyonso yankaka yina, kima mosi samu na kukipé samu na yawu awa na mbanza, kima ve samu na kuvwandisa bantu.”

⁶ Mu ke zola ntangu yankaka, mu banza, kana Nzambi kuzola, samu na kusala yawu na campagne kisika mosi kuna, kuvwanda samu na pene ya lukutakanu ya bangonda tatu mpe kubanda kaka na bidimbu yayi mutindu yayi, kuna na kati ya campagne. Na yina bantu lendaka bikana kaka na nzila ya yawu.

⁷ Na Kati Awa, ya ke kwenda na kapu 6 ya Apocalypse, na nzila ya 19. Na yawu beno ke baka bidimbu sambwadi, bampasi sambwadi, bakiadi tatu, kento yina vwandaka ya kuvwanda na zulu ya kibulu ya mbwaki, mpe nkama na makumi yiya na yiya ya mafunda. Oh, ya kele kaka na mingi ya yawu yina ke kota samu na kukanga bawu na ntwala ba pesa Kidimbu ya Sambwadi, mpasi ya sambwadi ke kubwa, mpungi ya sambwadi ke wakana. Mpe ya kele na bima mingi yina ke vukisa yawu kintwadi, mpe mosi na mosi ya yawu kele leso ya nene na yawu mosi.

⁸ Ntangu yayi beto kulumusa bayintu ya beto na mwa ntangu fioti samu na kisambu. Ntete beto sambila, ya ke vwanda na bayankaka awa yina ke zola ti ba bambuka bawu na kisambu yayi, mpe beno ke zabisa yawu na kutelemisaka maboko ya beno. Mpe na kati ya ntima ya beno, beno banza na Nzambi kaka yina beno kele na yawu nsatu ntangu yayi. Mpe mu ke sambila ti Yandi ke pesa yawu na beno.

⁹ Nzambi ya Ngolo nyonso mpe ya Lemvo, Yina kele Nzambi yina ke pesaka mvutu na bisambu, Tata yina zaba bana ya Yandi nyonso kele na nsatu ya yawu. Nge zabaka beto ntete beto butuka, mpe Nge me tanga bitambi ya makulu ya beto, bansuki ya kieleka ya yintu ya beto kele ya kutanga, mpe bampova ya beto nyonso kele ya kuteza na kitezolo ya Nge. Na yawu, Mfumu Nzambi, bika beto na suka yayi kusala keba na bima yayi, musiku yayi ya nene yina beto ke na yawu na ntwala ya Nge.

¹⁰ Mingi ya maboko yango kutelamaka na suka yayi, awa na mwa kimvuka yayi, mu banza ya vwandaka samu na kisambila banzutu ya bawu ya kubela, nkundi mosi ya luzolo me zimbana. Nge zaba bantima ya bawu mpe nyonso yina kele na kati ya bawu. Samu ti, ntangu Nge telamaka awa na zulu ya ntoto, na kati ya nzutu ya muntu yina ba bokilaka Yesu, Mfumu ya beto, Nge me zaba kieleka kinsweki ya ntima. Nyonso yina bantu lendaka banza na mabanza ya bawu, Nge lendaka tuba na bawu kaka na manima yina bawu vwandaka banza, “Samu na yinki beno ke banza na kati ya ntima ya beno samu na bima yayi?” Yesu zabaka mabanza ya bawu. Mpe beto ke tanga na kati ya Masonuku ti Nge kele mutindu mosi mazono, bubu yayi, mpe kukonda nsuka. Mpe ya kele mpe ya kusonika ti, “Kisika zole to tatu me vukana kintwadi, kuna mu ke vwanda na kati-kati ya bawu.” Na yawu Nge kele awa na suka yayi, na mutindu

ya Mpeve-Santu, mpe zaba konso nsatu yina kele na ntima ya bantu.

¹¹ Mu ke sambila Nge, Tata Nzambi, ti Nge ke vutula mvutu na bawu mpe ke tuba, “Ya me suka. Lombilu ya nge me pesama mvutu, mpe mu—mu ke na kufidisaka nge kivuvu kilumbu yayi ti nionso yina beno me lomba ti beno me kuzwa yawu.”

¹² Nzambi, beto ke bambuka moyo mingi-mingi bayina me kuzwaka mpulusu ve, telemisaka diboko ya bawu. Bika ti yayi kuvwanda ngunga yina bawu ke kuyamba Klisto mutindu Mvulusi ya bawu.

¹³ Ntete lukutakanu kusuka bubu yayi, ti ya vwanda na kima mosi kusalama, Mfumu, yina ke nata Mvwandulu ya Nge pene-pene mingi na bantu ti bawu ke zaba ti Yesu mosi yina tambulaka na Galilée me telama na kati-kati ya bantu ya Yandi, ba lendaka kwenda ntama awa bubu yayi na kivuvu mosi yina bayina katukaka na Emmaüs na ntangu yina. Ntangu ba vwandaka vutuka na nzila, na manima ya kutambula na Yandi kilumbu ya muvimba, vwandaka solula na Yandi, mpe Yandi vwandaka solula na bawu, mpe kasi ba vwandaka na mwa dibanza ti ya vwandaka Yandi.

¹⁴ O Nzambi, bambala mingi beto kele mutindu yina. Nge ke zonza na beto na kati ya kulala ya mwini, na kati ya kuyimba ya bandeke, na kati ya kupanzana ya matiti, na kati ya kufelela ya bafelele, na bankunga ya dibuundu, mpe beto me zaba fyoti ti ya kele Nge. Na kati ya bivinga ya kimbevo na lupitalu, bisika mingi yankaka, Nge ke tuba na beto mpe beto ke bakula fyoti ti ya kele Nge.

¹⁵ Ntangu yayi, Mfumu, na yina beto ke vutuka na bayinzo ya beto na suka yayi, bika ti beto, mutindu bawu salaka, kubakula, bika ti Nge sala kima mosi bubu yayi na kati-kati ya beto kaka mutindu Nge salaka kuna na manima. Bawu zabaka kima yina Nge salaka kuna na ntwala ya bawu. Nge salaka yawu na ntwala ya kukomama na Nge na kulunsi, mpe bawu zabaka ti yina vwandaka Mfumu yina vumbukaka na lufwa. Bawu vutukaka na bimvuka ya bawu, na kusepelaka mpe vwandaka kembila Nzambi, samu ti bawu zabaka ti Yandi vwandaka moyo. Mpe bawu tubaka, “Bantima ya beto vwandaka pela ve na kati ya beto mutindu Yandi vwandaka tuba na beto na nzila?” Mfumu, kumonika ya Nge kuna mpe kusala kima mutindu Nge salaka na ntwala ya kukomama ya Nge na kulunsi, siamisaka mvumbukulu ya Nge, ti Nge vwandaka Yesu mosi, ya salaka ti bawu bambuka moyo na masolo ya bawu nionso na Nge. Nge me tuba na beto sabala nionso, Mfumu. Ntangu yayi me monika na kati-kati ya beto mpe kukitalisa Nge mosi na konso ntima yina kele na nsatu. Samu beto me lomba yawu na Nkumbu ya Yesu, mpe samu na zola ya Yandi. Amen.

¹⁶ [Mpangi mosi ya kento ke na kuzonzaka na bandinga. Kisika ya mpamba na bande. Mpangi mosi ya bakala ke na kutendula—Mu.]

¹⁷ Ntangu yayi dibuundu ke sambila:

Tata ya beto Yina kele na Mazulu, bika ti Nkumbu ya Nge kuvwanda ya santu.

Kimfumu ya Nge kukwiza. Luzolo ya Nge kusalama na ntoto, mutindu yawu kele na Mazulu.

Pesa beto bubu yayi dimpa ya beto ya konso kilumbu.

Mpe lemvokila beto bayimbi ya beto, mutindu beto ke lemvokilaka bayina salaka beto yimbi.

Mpe twadisa beto ve na mpukumunu, kasi vulusa beto na yimbi; samu ti Kimfumu kele ya Nge, mpe ngolo, mpe nkembo, mvula na mvula. Amen.

¹⁸ Ti kana kilapi ya munu lendaka vwanda kisadilu ya kilipitele mpe papié ya munu ke vwanda ditadi ya kulengula, mpe Bandinga yayi yina mu ke tuba ntangu yayi, ba fwana sonika yawu na zulu ya yayi ti Yawu lendaka kwenda na bantu nionso.

¹⁹ Mpeve-Santu ya Nzambi kele na mitindu ya ngitukulu ya kusala na bantu ya Yandi. Bambala mingi na nzila ya mambu ya ngitukulu mpe na nzila ya makabu mpe balubokilu, yina kele kukondwa kubalula ntima, ti Nzambi pesaka bawu na bantu ya Yandi na lemvo ya Yandi.

²⁰ Mu kele na yinzo ntangu yayi, mutindu ya mwa konze mutindu yina. Mu ntangu nyonso ke bakaka ntangu yayi na yinzo, samu na ntangu yayi ya mvula, samu ti mu zola kupema ntangu mu ke kwendaka na kuzomba bampadi. Mpe mu vwandaka kuna na Kentucky na bankundi ya munu sabala yayi, na kuzomba bampadi, kisika ya munu ya kulutila mbote. Na mutindu nyonso mu sukaka ntima, ya kieleka ve samu ti mu lendaka kuzwa bampadi ve, kasi mu sukaka kaka ntima. Kima mosi vwandaka tuba na munu ti mu fwana vutuka na yinzo. Mpe mu lalaka na ditoma yina vwandaka vutuka.

²¹ Mvula me luta, mutindu beno nionso zaba, yina kele na bisono mpe diaka na kimbangi mpe na kati ya ba-bande. Mu vwandaka ya kuvwanda na kisika mosi awa na Indiana kisika Mfumu Nzambi kulumukaka mpe tubaka na munu, ti, ministere ya munu ya zole, yina vwandaka pene-pene ya bilumbu na ntuala. Mpe kuna ba bokilaka na luzingu bampadi tatu. Beno nionso me zaba disolo, mu me ndima yawu. Na mutindu mosi to yankaka, na kumataka na nzila mu. . . na ntangu mu bikaka bana-babakala yankaka kuna, mu kwendaka kuzomba, Mu—mu vwandaka na nsatu ya ngitukulu na kukwenda na kisika

yayi dyaka. Ya vwandaka na ntwala ya nsemo ya kilumbu, mvula vwandaka ke noka, mpe mu zabaka ve kana bawu zolaka kwenda kuzomba to ve, kasi ti mu ke kwenda kuna na bilanga ya kulonga. *Kuzomba* zola kutuba “kukwenda nge mosi, samu na kusambila.” Mpe mu telemisaka ditoma mpe mu basikaka mpe mu tambulaka kuna na kati ya bala-bala mpe mu kwendaka kuna na kati ya matiti, mpe kaka na ntwala ya vwanda kilumbu, ya ke vwandaka fioti ya lubungi, na suka.

²² Mu telemaka mpe mu pesaka mwa kisambu, mutindu na mumesanu, mpe mu tubaka na Tata, ti, “Kaka yina mu vwandaka na yawu nsatu, samu na kukubika yawu.” Mu ke kwikilaka ve na kusola ya bima, to kubebisa; mu me bulaka ata fioti ve disasi na ndeke mosi na luzingu ya munu samu na kumeka dikani, to kima mosi yankaka. Yina mu ke zombaka, mu ke kudya, to mu ke pesa na muntu yina ke kudya yawu. Mu ke kwikilaka ve ti mu vwandaka telemina kima mosi. Mu ke kwikilaka ve na kusala bima yina, samu ya kele mbote ve.

²³ Kuna mutindu mu balukaka mpe bandaka na kukota na mwa nzila mosi ya fioti ya mumesanu na lweka ya lupangu ya bibulu yina sabukaka kuna na kifwani ya L na kati ya bayinti, mpe kima mosi ya ngitukulu salamaka kuna. Banzingulu ya munu nyonso, mu me kuzwaka ntete ve kima mutindu yina. Mu talaka na zulu ya mongo kisika mu vwandaka ya kutelama, mpe kuna, mu vwandaka basika na nsongi ya mongo, kwisaka mikyama tatu. Mpe ya vwandaka na bametele yivwa na zulu. Ntete, mu talaka mpe mu monaka Nsemo mpe mu balukaka, samu ti mu banzaka ti ya lendaka vwanda mwini ke basika. Na zulu ya dibanza ya zole, ya vwandaka ve na ntwala ya mwini, ya vwandaka na sude. Mpe kima yankaka, ya vwandaka ya lembami, ya matuti, ya mvula, ya vwandaka noka bisika nionso. Ya vwandaka Kilumbu ya nana ya Ngonda ya nana, ya nsuka na suka, mpe beno zaba mutindu mvula vwandaka noka. Mpe ya kele matuti ya lembami bisika nyonso.

²⁴ Mpe mu talaka dyaka. Mpe kuna ya vwandaka, ya vwandaka ya kukula yinda mpe ya yinda, mukyama tatu. Mu katulaka yimpu ya munu. Mu tululaka munduki ya munu. Mu bandaka na kutambula na ntwala ya yawu na maboko ya munu na zulu. Kima mosi monanaka tuba na munu, “Yayi me kuma pene-pene mingi.” Mu zolaka kuvwanda mpe kukatula baboti ya munu yina mu lwataka, samu na kumona kana mu lendaka tambula mwa fioti pene-pene mingi. Kasi mu belamaka na mwa bametele fioti mpe mu monaka kulele ya yawu, ya kufika mutindu lubungi mosi ke na kutambulaka na ziunga. Mu telemaka swi tii na mwa minuti fioti. Ya vwandaka basika mbala mosi na nsongi ya mwa mongo ya fioti. Mpe mu vwandaka tala mbote, mutindu tatu (mosi na diboko ya kibakala, mosi na diboko ya kikento, mpe mosi na kati-kati) ke kulumuka na kati-kati ya bolu mutindu yayi. Nionso yina ya vwandaka, vwandaka ya moyo, Yawu

vwandaka tambula mpe vwandaka sala ba-mouvement ya Yawu. Mpe mu telemaka kuna kaka mutindu ya vwandaka lubungi, na ntwala ya kilumbu.

²⁵ Mu balukaka mpe talaka diaka, mpe mu bokaka, “O Nzambi, yinki Nge zola ti kisadi ya Nge zaba?”

²⁶ Kaka ntangu yina Mpeve ya Mfumu kotaka mpe tubaka, “Yesu ya Ngwisani ya Malu-malu kele Yehowa ya Ntama, Yandi sobaka kaka mumpanzi ya Yandi na Mpeve na Muntu.” Yina vwandaka siamisa, kieleka, Nsangu ya munu ya Yandi. Na kubikaka munu kuzaba, na kivuvu ti bamvula makumi tatu na mosi yayi vwandaka ve ya mpamba.

²⁷ Na ntangu mu bandaka na kubelama, Yawu bandaka na kuzimbana, mpe kulumukaka na kati ya mwa kima yayi mutindu bolu mosi, mpe na manima zimbanaka. Mu belamaka pene-pene. Mu vwandaka na boma ya kubelama, samu ti Yandi telemisaka munu ntete mu kuma kuna.

²⁸ Mu balukaka mpe talaka ti Nsemo yina, mutindu Yawu vwandaka sema samu na munu, vwandaka kaka na nyonso ya kieleka na nzila na yinti kisika mu vwandaka na mvula me luta, kisika bampadi monikaka. Baminuti makumi tatu na tanu to makumi yiya na ntwala, mu kulumukaka na mfinda mpe kuna na yisi ya mwa-masa mpe nionso yina, tii mu kumaka na yinti yayi yina ke kabukaka na bimvuka yiya (na esete, node, wesete, mpe sude), bintala yiya ya yinti, ya kulemba. Mpe mu mataka na kati ya kintala yayi, mpe vwandaka kisika mu vwandaka ntangu Yandi tubaka na munu samu na Disonuku yayi, “Kana beno tuba na mongo yayi, ‘Katuka awa.’” Mpe mutindu mu vwandaka ya kutelama kuna mwa fyoti, mu vwandaka banza dyaka ve na mukyama, ya bikaka dibanza ya munu. Mu telemaka kuna. Mpe yayi vwandaka mvula mosi ya yimbi samu na kuzomba bampadi, bima nionso kumaka na manima ya ntangu, bampadi ve.

²⁹ Mu banzaka, “Awa kele kisika Nzambi pesaka munu bampadi yina na mvula me luta, samu na kukwiza na luzingu.” Mu katulaka dyaka yimpu ya munu, mpe mu tubaka, “Mfumu Nzambi, Nge kele kaka Yesu mosi. Nge kele kaka Nzambi.”

³⁰ Mpe Kima mosi tubaka na munu, “Yikwa nge ke na yawu nsatu na ntangu yayi?”

³¹ Mu tubaka, “Kaka mutindu mu salaka ntangu yankaka yina, ndilu.” Mpe na yina mu tubaka, “Mu ke kuzwa ndilu yayi na ntwala ya ngunga kumi bubu yayi.” Mpe ya ngitukulu mutindu ya ke monana, kaka kuna mu vwandaka na kizunga mosi ya kulutula yimbi ya bambelele, kisika ya vwandaka na mikolobo ya bambembele, mpe mutindu ya yinsi mosi ya poto-poto, mpe mbembele mosi ya kulutula nene kwisaka kutatika munu kaka na lweka ya disu, mpe mu tubaka, “Mosi ve na kati ya bawu ke sala munu yimbi kilumbu yayi,” ata mikolobo mosi ve to kima

mosi ve na munu. Mpe, ntete mu zaba yawu, mu tubaka, “Mwini ke sema na baminuti makumi tatu.”

³² Mpe kulutila ve mu tubaka yawu tii kuna, kaka na manima ya munu, mpadi mosi kaka kieleka mutindu mosi yina na mvula me luta, ya ntwenya, ya mbwaki, dumukaka na zulu ya kintala pene ya bametele makumi sambanu na yiya mpe bandaka na kuboka. Mu balukaka. Na bitamina yayi ya yinda, mu lendaka na mpasi, na nzila ya ditenzi yayi ya ngolo, kumona disu ya yandi. Mu bulaka disasi, yimeni, mu banzaka ata fioti na dikani, ata fioti ve diaka na zulu ya mpadi. Mpe disasi vwandaka kaka kieleka ya kukangama na disu kisika ya vwandaka mbala yankaka.

³³ Mu kulumukaka na kati ya mfinda. Mpe kieleka na minuti tatu ya ngunga kumi, mu bulaka mpadi ya munu ya tatu, kaka mutindu ya vwandaka mvula me luta, kaka kieleka mutindu mosi. Na baminuti tatu na ntswala ya kumi. Nzambi, na kuvwandaka Zuzi ya munu ya nene, ata mbembele mosi ve niungutaka kilumbu ya muvimba, kaka kisika ya kele kaka na ba-tonne ya yawu, mu fwana banza, kana ba lendaka tula yawu na kitezolo. Mpe mu me monaka ntete ve to me kuwaka mosi. Mu vwanda kuwa samu na bawu, samu na kumona kana mu lendaka sala yawu. Mpe mu kuwaka makelele mingi, mu banzaka, “Ya kele na mosi kisika mosi kuna,” mpe mu kuwaka mpe ya vwandaka kaminio, kuna na bala-bala ya nene. Mpe kieleka na minuti makumi tatu kubanda na ntangu yina, mwini lezimaka mbote mpe semaka.

³⁴ Na yina mu vutukaka na kisika yina. Mpe mu vwandaka banza, ntangu mu tubaka “ndilu,” yina vwandaka zola kutuba *bampadi tanu*, yina kele ndilu na Indiana. Kasi mu ke bambuka moyo na mvula me luta, ntangu Yandi yufulaka munu bantu yikwa bakaka samu na munu mvindu, mu tubaka, “tatu,” mpe mu kele kaka na tatu. Na yawu mazono mu vutukaka, mu vwandaka kwenda kisika mosi dyaka, mpe Kima mosi tubaka, “Kukwenda ve. Sabuka nzila.”

³⁵ Mpe kieleka na ngunga ya kumi, na ntangu ya kieleka, na ngunga ya kumi na monte ya munu, Mu bulaka disasi na ndilu ya Indiana, mpadi ya tanu. Mu zola beno kutala ti ya vwandaka na mikyama tatu, mpe ya vwandaka na bima tatu ba tubaka, bampadi tatu ba kuzwaka. Ya vwandaka na bima tatu: bampadi tatu na ngunga ya kumi, ya kele ve na bambembele, mwini ke sema na baminuti makumi tatu. Mpe ya vwandaka tatu samu na kupesa kimbangi ya yawu: Mpangi Banks Wood, mwana ya munu Billy Paul, mpe mwana ya yandi David, samu na kupesa kimbangi na yawu.

³⁶ Ntangu mu monaka mikyama yayi, pene ya nene mutindu nsemo yayi kele, ti Wanzio ya Mfumu, kasi ya vwandaka na tatu ya bawu yina vwandaka kota na Mosi. Oh, mutindu yawu

sadisaka ntima ya munu, na kuzaba ti Nzambi, Yesu kele ve kaka muntu mutindu bantu ke banzaka ti Yandi kele, kaka profete, mutindu dibanza ya bilumbu yayi bubu yayi ke banza ti Yesu kele kaka profete, Yandi kele Yehowa ya Ngwisani ya Ntama yina kumaka nsuni mpe zingaka na kati-kati ya beto. Mpe, kuna, yina pesaka munu ngolo. Na yina, mu vwandaka banza na dilongi yina, ti Nzambi sosaka bantu mingi.

³⁷ Ntangu yayi, ya kele na kimvuka ya bantu, yina ke kukibokila “ba-Unitaire” to “Yesu Kaka.” Mu ke wisana na bawu ve na zulu ya dibanza ya bawu. To mu ke wisana ve—ke wisanaka na kimvuka yina ya ba-trinitaire yina ke tubaka ti ya kele na Banzambi tatu ya luswaswanu, nsongi ya ba-trinitaire. Kasi mu ke kwikila ti tatu, Tata, Mwana, mpe Mpeve-Santu, kele Mosi, ti bawu kele bisalu tatu ya Nzambi mosi. Yandi zingaka na kati ya Butata, na kati ya Dikunzi ya Tiya; Yandi zingaka na kati ya Bumwana, na kati ya Yesu Klisto; mpe Yandi ke zinga ntangu yayi na Mpeve-Santu, na kati ya Dibuundu ya Yandi. Mfumu Yesu mosi yina kumaka nsuni mpe zingaka na kati-kati ya beto, kele na beto kilumbu yayi, na kati-kati ya beto, na mutindu ya Mpeve-Santu.

³⁸ Ya banzingulu nyonso! Ntangu mu balukaka ntete mpe monaka Yawu, mu banzaka ntete ti Yawu lendaka vwanda mwini na nzila ya dituti kisika mosi kuna, kasi ya vwandaka ntete kubasika ya mwini. Kuna ntangu mu vutukaka dyaka, mpe monaka ti ya vwandaka ve nsemo, ya vwandaka mikyama. Mpe kuna ntangu mu talaka mpe monaka yawu, mu kumaka ya kulemba.

³⁹ Kaka muntu mosi tubaka na munu, “Nge vwandaka na nsatu ya kuboka?” Ve, mu vwandaka ve na nsatu ya kuboka. Banzingulu yayi ata fioti ve ke sala beno kuzwa nsatu ya kuboka, ya ke sala beno kaka kukota na diambu, kaka kisika yina beno zaba ti ya kele na kima yina ke tubaka na beno, kaka nsatu ya kiese.

⁴⁰ Ntangu yayi, bima yango kele kieleka. Mu zaba ti beto kele na bima yina ba tubaka, ti bambala mingi bantu ke tubaka, “Oh, mu ke kwikilaka ve na bima ya mutindu yina.” Mu lendaka ve kupesa kimbangi ya yawu, mu zaba ve. Mu lendaka kaka kupesa kimbangi samu na yina mu zaba kele kieleka. Mpe Nzambi ya Ngolo nyonso, Yina sonikaka Biblia yayi, mpe mu kele kisadi ya Yandi, Yandi zaba ti ya kele kieleka.

⁴¹ Beno banza na yawu, ti kilumbu yina beto ke na kuzinga, kaka na ntwala ya nkwizulu ya Mfumu, Yesu tubaka, “Ya ke vwanda na bidimbu na mazulu mpe na ntoto, bima ya nene, basoucoupe volante, ba-missile, ntangu ya kidi-kidi, kyadi kati-kati ya bayinsi, mambu ya boma na zulu ya ntoto.” Mpe beto ke na kuzinga na kilumbu yina, samu na kumona bima yango.

⁴² Ntangu yayi, samu na Nsangu na suka yayi yina mu soolaka, Mu zola beno kubaka na munu na Masonuku, kuna na Zacharie. Ya vwandaka ya munu . . . Zacharie, kapu ya 4.

⁴³ Ya vwandaka nsatu ya munu na kutuba na beno bima yayi. Bambala mingi bima ke salamaka ti mu ke tubaka yawu ve—ve, mu ke tubaka yawu ve. Kasi yayi vwandaka ya ngitukulu mingi samu na munu na kubumba yawu na dibuundu. Ba fwana tuba yawu! Mpe, na ntuala ya Nzambi Yina mu me telama, ya kele kieleka. Mu zaba ti ya kele na Nzambi, mpe mu zaba ti Yesu Klisto kele Mwana ya Nzambi, Emmanuel, na kuzingaka na kati-kati ya bantu ya Yandi bubu yayi na mutindu ya Mpeve-Santu. Mpe mu zaba ti Nkwizulu ya Mfumu me belama, ntangu bidimbu mpe mambu ya ngitukulu ke na kumonana.

⁴⁴ Beto me katuka kaka kuluta Bansungi Sambwadi ya Dibuundu, mpe me longoka ti beto kele na Nsungi ya nsuka mpe ya Dibuundu ya Laodicée, ntangu dibuundu ke vwanda yina ke kipe diambu ve, ya ke kuma madidi, ke sala denomination, mpe ba ke sala organisation; ba-organisation zolaka baka yawu, kudya yawu. Kasi nsilulu ti ya ke vwanda na ndambu bikanaka. Ya ke vwanda na Dibuundu yina ba ke mwangisa bisika nionso, kasi Nzambi ke vukisa Yawu kintwadi mpe ke zangula Yawu na Nkembo; mwa nkonga mosi ya kusantisama kisika mosi kuna, ke vingila Mfumu.

⁴⁵ Kuna kilumbu yankaka yina ntangu mu kuzwaka *Basabala Makumi Sambwadi ya Daniel*, mu vwandaka ya kutelama awa na chaire, Kima mosi bulaka munu, mu me vwandaka ata fioti ve na kiyeka ya kukwenda ntama na yawu. Kumona ngunga yina beto ke na kuzinga! Mu zola kwenda kisika mosi mpe kusala kima yankaka, samu na kubumba yawu na mabanza ya munu. Mu kele na bantu mingi ya luzolo yina kele ya kuvuuka ve. Na kuzabaka, yinki mu lenda sala samu na kuzwa bawu mpulusu? Yinki mu lenda sala? Mu me longa Nsangu ya mbote. Nzambi me sala bidimbu ya nene mpe mambu ya ngitukulu mutindu Yandi salaka kubanda yinza, kubanda na bilumbu ya Mfumu Yesu, ata mbala mosi ve ti Yandi salaka yawu na disolo nyonso ya ntangu. Mpe na yinza ya muvimba ya me kwenda. Mpe kaka yinza ke kuma ntangu nionso yimbi mingi. Kasi na yina mu fwana bambuka moyo ti beto ke na kuzinga na Nsungi ya Dibuundu ya Laodicée, kisika bawu ke kuma yimbi mingi, mpe Yawu tubaka ti bawu ke sala yawu.

⁴⁶ Na yina mu soolaka na suka yayi, na kuvwandaka ti ba nwanisaka mingi Nsangu yina, kima yankaka yina mu me kuzwa na manima ya yina, kele, kulonga lemvo. Mu zola kuzonzila na zulu ya yawu na suka yayi mutindu mu tangaka kapu ya 4 ya Zacharie, kitini ya yawu.

*Mpe wanzio yina zonzaka na munu kwizaka dyaka,
mpe vumbulaka munu, mutindu muntu yina ba me*

vumbula na . . . mpongi,

Mpe yandi tubaka na munu, Yinki nge ke mona? Mpe mu tubaka, mu talaka, mpe tala mwinda nyonso ya wolo, na zulu ya yawu, na bolu na zulu ya yawu, mpe minda sambwadi ya yandi kuna, mpe batiyo sambwadi na minda sambwadi, yina kele na zulu ya yawu:

Mpe bayinti zole ya olive pene-pene ya yawu, mosi na lweka ya kibakala ya bolu, mpe yankaka yina kuna na lweka ya kikento.

Na yawu mu vutulaka mvutu mpe tubaka na wanzio yina zonzaka na munu, na kutubaka, Yinki kele yayi, mfumu ya munu?

Mpe wanzio yina zonzaka na munu pesaka mvutu mpe tubaka na munu, Nge zaba ve yinki yayi kele? Mpe mu tubaka, Ve, mfumu ya munu.

Na yina yandi pesaka mvutu mpe tubaka na munu, na kutubaka, Yayi kele ndinga ya MFUMU na Zorobabel, na kutubaka, Ya lendaka vwanda ve, to na ngolo ve, kasi na mpeve ya munu, me tuba MFUMU ya makesa.

⁴⁷ Beno me mona? Nsangu ke kwisa ve na mwa bima ya nene to bangolo, kasi na nzila ya Mpeve ya Nzambi! Nzila ya nsuka, nzila ya 7.

Nani nge kele, O mongo ya nene? na ntwala ya Zorobabel nge ke kuma lepele: mpe yandi ke basisa ditadi ya yintu na na kubokaka, na kubokaka, Lemvo, lemvo samu na yawu. Lemvo, lemvo samu na yawu.

⁴⁸ Beto nionso me zaba Masonuku yayi, yina ke tangaka Biblia. Beto zaba ti yayi vwandaka na ntangu ya kuvutuka ya tempelo. Mpe Zorobabel vwandaka ntinu ya nene na kati-kati ya bantu, yina tulaka lufulu ya yinzo. Ntangu yayi, beno, mu zola ti beno lwata mbanzulu ya beno ya kimpeve, kazaka ya kupakulama, na suka yayi, mutindu beto ke banza. Mpe ntinu yayi ya nene bakaka lukanu ya kutunga diaka yinzo ya Mfumu. Mpe na manima, ntangu yandi salaka yawu, yandi tulaka ditadi ya lufulu.

⁴⁹ Mpe na yina beto ke landila na kutanga, beto ke mona ti Nzambi tubaka, “Zorobabel tulaka lufulu na maboko ya yandi, yandi ke basisa diaka ditadi ya yintu.” Mu zola beno kubakula, Yandi tubaka ata mbala mosi ve ti yandi ke basisa “Ditadi ya nsongi.” Yandi ke basisa “ditadi ya yintu.”

⁵⁰ Mpe beto zaba ti Masonuku ke tuba ti Yesu kele Mfumu ya Ditadi ya nsongi, mpe Yandi kele diaka Ditadi ya yintu. Ntangu yayi kana beto ke banza na baminuti fyoti, ti, munatinsangu ya sambwadi vwandaka “kuvutula Lukwikilu ya bana na batata.” Na nzonzolo yankaka, kutunga diaka Dibuundu na yisi ya Ngolo ya Mpeve. “Ve na nzila ya ngolo, ve na nzila ya

ngolo, kasi na nzila ya Mpeve ya Munu,” me tuba Mfumu. Ve na nzila ya organisation, ve na nzila ya denomination, kasi na nzila ya Mpeve-Santu, Nzambi ke basisa Dibuundu na kilumbu ya nsuka.

⁵¹ Zorobabel, ntinu na Josué, vwandaka yandi yina zolaka basisa ditadi yayi ya yintu. Yandi tulaka lufulu, yandi vutulaka bantu na lufulu, na kifwanukusu.

⁵² Na yina, beto nyonso zaba ti minda yayi mpe nyonso yankaka vwandaka talisa ba-Juif mpe dibuundu. Ba vwandaka “bintala ya olive,” Biblia ke tuba awa. Mpe divala ya olive, beto kele divala ya mfinda yina ba namikaka na nsimbulu ya yinti ya olive; Bantu ya makanda! Mpe kuna na kati ya bintala zole yayi kwisaka batiyo ya encensoir, yina vwanda kwenda na kati ya minda sambwadi ya wolo, samu na kupesa Nsemo na Bansungi Sambwadi ya Dibuundu.

⁵³ Ntangu yayi beno bambuka moyo, na malongi ya beto na zulu ya baleso yina beto me manisa, ti beto bakaka pyramide ya nene mpe longukaka yawu na mwa ntangu fioti, Enoch zolaka tunga yawu. Mpe ba tulaka ata fioti ve ditadi ya yintu na pyramide. Mu vwandaka kuna. Ntungulu ya yawu ba lendaka ata fioti ve kuyingisa yawu tii na kilumbu yayi. Beto kele ve na bamasini yina lendaka tunga pyramide, bangolo ve (kana ngolo ya atomique ve) yina lendaka kutunga pyramide, samu ya kele nene mingi. Matadi yina vwandaka na ba-tonne mpe ba-tonne mpe ba-tonne, ya kutelama kuna na kati ya mupepe, ya kuvukisa mbote ti lutebo ya fioti lendaka ve. . . Mpe ya kele ve ya kutungama na sima, ba me zengaka yawu kaka ti ba me vukana mosi na yankaka.

⁵⁴ Ya kele mutindu Nzutu ya Yesu Klisto zolaka vwanda, na yawu ya kuzenga na Mpeve-Santu, na nzila ya Kisadilu ya nene ya Nzambi mpe Kisadilu, ti beto ke kota mutindu Muntu mosi. Beto kele ya kukabuka ve. Beto zolaka vwanda Muntu mosi! Mpe ya ke lakisa ti ata masini ve lenda sala mutindu yina. Ya ke lomba Nzambi na kusala yawu. Ata mekaniki ya organisation, ata bimvuka, ata mosi ve ya bima yayi lenda sala yawu, mutindu mbote mabanza ya bawu kele. Ata mbala mosi ve ti bawu lenda sala yawu, samu ti ya ke lomba Nzambi na kusala yayi, Mpeve-Santu.

⁵⁵ Mu banza ve ti mu kele na billet ya dollar mosi na posi ya munu. Kasi ya kele. . . Yinga, mu ke kwikila, mu ke na billet ya dollar mosi. Beno lemvokila munu. Na manima ya dollar yayi beno ke mona kidimbu ya Etats-Unis na lweka ya kikento, ke tala na ntuala ya beno. Na munu, ya ke vwanda na lweka ya kikento; ya beno, ya kele kieleka. Ya kele ngononi. Mpe dyaka na kati kuna kazaka ya maboko mpe nyonso yankaka yina. Kasi na lweka *yayi* awa, kaka lweka, samu na munu, beno ke mona pyramide. Mpe beno tala, na zulu ya pyramide kele ditadi ya

yintu, mpe na nsi kuna ke tuba, “Kidimbu Ya Nene.” Ata ti na zulu ya mbongo ya beto, ti beto fwana kuzaba. Mumpani mosi ve lendaka kuvwanza kimakulu Buklisto. Konso mukanda yina beno ke tula date, date ya mbutukulu ya Mfumu ya beto. Konso manaka, bima nionso ke zonzila na yina me tala Yandi. Mpe ata mpe na mbongo ya beto, Ditadi ya yintu, yina kele Klisto! Samu na yinki ba tulaka ve ditadi ya yintu na zulu ya pyramide? Samu ba losaka Ditadi ya yintu ntangu Yawu kwisaka.

⁵⁶ Kasi ntangu yayi, landila profesii, ya ke vwanda na Ditadi ya yintu. Mpe mu zola ti beno bakula yawu, ntangu Ditadi ya yintu ke kwisa, ntinu yina ke boka Nsangu ke dila “Lemvo! Lemvo!” Samu ti ya kele na nzila ya lemvo beto me kuzwa mpulusu, ya kele ve na nzila ya bisalu, ti muntu mosi ve lendaka kukizangula. Mpe Nsangu ya lemvo ba me diata yawu na yisi ya makulu ya bantu tii kuna ya me kuma nsoni. Bayankaka na kati ya bawu ke kwendaka mbangu na lukengolo ya Seko, bayankaka ke kwendaka mbangu na bima nionso. Kasi, Nsangu ya kieleka ya lemvo kele kaka mutindu mosi, mpe ya kele kisika Satana ke meka na kubasisa yawu na Dibundu. Kasi ya kele lemvo ya Nzambi ti beto nyonso kele ya kuvuuka.

⁵⁷ Na yawu na Bunzambi ya Yesu Klisto, kana Mfumu Nzambi lendaka kwiza kuna mpe kusiamisa ti ya kele Kieleka, kaka yina ve, kasi na nzila ya Ndinga ya Yandi Yandi ke siamisa ti ya kele Kieleka, mpe na nzila ya bidimbu mpe mambu ya ngitukulu Yandi ke siamisa ti ya kele Kieleka, na yina, mpe, lemvo kele Kieleka. Na yina samu na yinki muntu lenda tonga mpe kutuba ti lemvo kele yimbi, ti “beto me kuzwa mpulusu na nzila ya bisalu”? Beto me kuzwa mpulusu na nzila ya lemvo, ti na nzila ya lukwikilu, na nzila ya bisalu ve. Bisalu ke lakisa ti beno me kuzwa mpulusu. Kasi yina ke vulusa beno kele lemvo ya Nzambi. Lemvo ke vulusa beno. Lemvo kele yina Nzambi ke salaka samu na beno. Bisalu kele yina beno ke salaka samu na Nzambi, samu na kulakisa matondo na yina Nzambi salaka samu na beno. Kasi na lemvo beno me kuzwa mpulusu!

⁵⁸ Bantu yankaka ke banzaka, “Samu mu ke kwendaka kota na dibundu, mu ke tula nkumbu ya muni na buku, yawu yina kaka mu fwana kusala.” Bantu yankaka ke banzaka, “Samu ti mu ke bokaka, ya kele nyonso yina mu fwana sala.” Bayankaka ke banzaka, “Samu ti mu ke zonzaka na bandinga, kaka yina mu fwana sala.” Bayankaka ke banzaka, “Samu ti mu kele na ngolo ya kubelusa bambevo, kaka yina mu fwana sala.” Ya kele ve! Ya kele lemvo ya Nzambi yina ke vulusa beno, lemvo ya ngitukulu ya Nzambi. Mu lenda tula kivuvu ve na makuki mosi. Bayankaka tubaka, “Mbote, ya kele na muntu ya nene. Bakala yina, mu me kuwa yandi kutelama mpe sala *yayi*, mu me kuwa yandi kutelama mpe kusala *yina*.”

⁵⁹ Paul tubaka, na ba-Corinthiens ya Ntete 13, “Ata ti mu zonga na bandinga ya bantu mpe ya Bawanzio, ata ti mu kele

na kuswasikisa mabanza, ata ti mu kele na makabu, samu na kudisa, mu ke baka bima ya munu nionso samu na kudisa bamputu, ata ti mu lenda katula myongo na lukwikilu, ata ti mu kele na luzabu ya kubakula bima nyonso, Mu kele kima ve tii zola ke kwiza, yina kele lemvo.” Nzambi fwana sala yawu. Beno lenda sala bima nyonso yayi mpe dyaka kuvwanda ya kuzimbana. Ya kele lemvo yina ke vulusa beno, lemvo ya Nzambi samu na dikanda ya bantu.

⁶⁰ Kubanza na Yandi! Mu vwandaka banza na lemvo yina na mbala mosi na manima ya yina monikaka na Kilumbu ya tanu na suka, kaka na kubasika ya kilumbu, kuna na bilanga yina ntangu mu vwandaka na zulu ya kitini ya yinti, na ntuala, mpe masa ya meso kulumukaka na meso ya munu. “O, Nzambi, lemvo ya Nge me kukikulumusaka samu na kuvulusa munu. Samu na yinki Nge me vwandaka ntete na mawa ya mutindu yina na zulu ya muntu ya mputu, yina me longukaka ve mutindu munu mosi? Wapi mutindu Nge kulumukaka na mwa tabernacle ya beto ya kukikulumusa, kisika ngemba, mpe bantu ya kukikulumusa ya luzingu, ya mputu, kele na kima ve na yinza yayi, mpe dyaka lemvo ya Nge ke mwangana na kati ya bantima ya beto, na nzila ya Mpeve-Santu, ti Nge belusa bimbevo ya beto mpe vulusa masumu ya beto, vulusa beto na masumu ya beto, mu zola tuba, mpe sala beto bantu ya Nge, kusala na beto?”

⁶¹ Na yina mu banzaka na David, yinki mutindu ti ntangu yandi bakaka lukanu ya kutunga yinzo samu na Mfumu, yandi tubaka, “Ya kele mbote ve samu na munu na kuzinga na yinzo ya cèdre, mpe Sanduku ya ngwisani ya Nzambi ya munu na yisi ya bampusu ya mameme mpe tabernacle.”

⁶² Nzambi tubaka na profete, “Kwenda tuba na kisadi ya Munu, David, Mu katulaka yandi na lupangu ya mameme, na kupesaka bawu madia na mwa mameme yina kuna ya papa ya yandi, mpe ‘salaka nge nkumbu ya nene mutindu bantu ya nene na ntoto.’”

⁶³ Mu banzaka na lemvo ya Nzambi, wapi mutindu Yandi lendaka sala yawu, kuvulusa tii na nsuka! Mpe na yina mu ke baka muntu ya mputu mutindu munu mosi, mpe pesa munu ntangu ya mbote ya kulonga Nsangu ya mbote mpe kumona bayankaka kuvuuka, kumona bawu kubeluka; beno me mona bayinzo yina ba bukaka, yina ba sungikaka diaka; beno me mona baluzingu yina ba me bebisa, yina ba yidikaka diaka. Mpe samu na kupesa munu lemvo! Mu banzaka, “Oh, ya kele lemvo ya ngitukulu!” Na manima kwisa kutala muzombi ya bampadi ya kubwa, na yisi kuna na kati ya bamfinda, mpe ke sala Yandi mosi na mutindu ya *mukyama*, yina zola kutuba “ngwisani,” na Nsangu yina Yandi pesaka munu samu na kulonga, mpe kusala yawu kuna na ngwisani, ti Yandi kele na manima ya Yawu! Mpe Yandi ke vwanda na manima ya Yawu, samu ti Nsangu kele ya Yesu Klisto mpe nkembo ya Yandi.

⁶⁴ Wapi mutindu Yandi me bika munu kukwenda na yinza ya muvimba, na yinza ya muvimba, na bayinsi, na mafuku ya bantu, mu monaka mafuku kukwiza na Mfumu mpe kundima Yandi mutindu Mvulusi ya bawu mosi, monaka bawu ya kufuluka na bumbote ya Yandi mpe ya kusantisama na ngolo ya Yandi, me mona bawu me beluka na ngolo ya Yandi ya nene ya ngolo nionso. Na yina mu lenda boka mutindu profete, mpe kutuba, “Ya kele ve na nzila ya ngolo, to ve, kasi ya kele na nzila ya Mpeve ya Nzambi.” Ve na nzila ya ndongosolo, ve na nzila ya théologie, kasi na nzila ya Mpeve ya Nzambi Yandi ke vulusa bantu. Na nzila ya Mpeve ya Nzambi Yandi ke belusaka bantu. Ya kele Mpeve ya Nzambi yina ke pesaka Nsangu na bantu. Ya kele Mpeve ya Nzambi yina ke siamisa Ndinga.

⁶⁵ Beto me kuzwa ba-théologien bubu yayi, beto kele na Milongisi ya Théologie, beto kele na bantu ya nene bisika nionso na yinza, yina kele mayele mingi, ya ngangu mpe ya kulonguka. Kasi ya ke lomba kukikulumusa samu na kukwikila na Nzambi, samu na kusala Ndinga ya Yandi kuzonza, samu na kulakisa ti Yesu Klisto kele mutindu mosi mazono, bubu yayi, mpe kukonda nsuka. Ya ke lomba ntima ya kukikulumusa yina me biekama na ntuala ya Nzambi, samu na kunata Yesu Klisto na ntangu yayi. Amen! Kana ya bakaka théologie, yinki ba-Presbytérien, ba-Methodiste, ba-Baptiste, ba-Catholique, mpe nionso yina; beto zolaka kuzwa ve siansi, beto bantu ya bamputu yina longokaka ve. Kasi ya ke lomba luzabu ve. “Ve na nzila ya ngolo to na nzila ya ngolo, kasi na nzila ya Mpeve ya Munu,” me tuba Nzambi, “Mu ke monisa mansweki yayi.” Mpe, “Yandi ke dila na yawu, Lemvo, lemvo, na kuboka mpe kuboka.” Ya kele yina ya kele bubu yayi, Nzambi kele lemvo ya ngitukulu samu na bantu ya Yandi. Mutindu Yandi ke bakaka muntu yina longokaka ve, yina longokaka ve, yina ke lakisa ti Yesu kele mutindu mosi.

⁶⁶ Ntangu Yandi kwisaka, Yandi kwisaka ata fioti ve na ba-théologien ya nene. To Yandi kwendaka ve na Caïphe, nganga-Nzambi ya ntete; kaka samu na kufundisa yandi.

⁶⁷ Kasi Yandi bakaka milobi-mbisi, bantu yina vwandaka bamputu mpe tambulaka luzingu ya mumesanu. Mpe kuna Yandi monikisaka Yandi mosi, mpe tubaka, “Beni landa Munu, mpe Mu ke sala beni milobi ya bantu,” kulakisa ti lemvo ya Yandi me kulumuka kaka mpe me katuka na ba-Juif na Bantu ya makanda, samu na kubokila bantu samu na Nkumbu ya Yandi na bilumbu yayi ya nsuka, mutindu beto vwandaka me tala yawu. Lemvo ya ngitukulu, wapi muningu ya lembami!

⁶⁸ Lemvo kele ya ntama. Lemvo kele ya ntama mutindu mosi ya yinza kele. Lemvo vwandaka kutalisama ntete na dikanda ya bantu ntangu beto kuzwaka na mbandukulu dikanda ya bantu. Ntangu dikanda ya bantu vangamaka ntete na disamba ya Eden, na suka yina ya mudidi ntangu mwa kento yina zabukaka ndilulu ya kukabwana, mpe kwendaka ya kuswaswana na

Misiku ya Nzambi mpe kotisaka bakala ya yandi na kusala kima mutindu mosi, na yina ba bukaka musiku. Musiku fwana kuzwa kitumbu to ya kele ve musiku. Mpe musiku vwandaka, “Kilumbu beno ke kudya yawu, kilumbu yina kieleka beno ke kufwa.”

⁶⁹ Beno bambuka moyo, kiti ya lufundusu ya ntete vwandaka na zulu ya ntoto, mpe ya vwandaka na disamba ya Eden. Mpe kiti ya lufundusu ya nsuka ke vwanda na zulu ya ntoto, na ntangu ya nsuka, Kiti ya kimfumu ya Mpembe.

⁷⁰ Kasi ntangu Yehowa kulumukaka, mu lendaka banza ti ya vwandaka ve na mbwetete ya kulezima, ya vwandaka mpimpa mingi na nsemu yina mwa disamba yina vwandaka mbala mosi, samu disumu katulaka yawu, katulaka Nsemu na kati-kati ya bawu.

⁷¹ Yawu yina diambu na mabuundu bubu yayi. Yawu yina diambu na bantu bubu yayi. Disumu me katula Nsemu ya Nzambi ya moyo, samu na kulakisa ti Klisto kele dyaka mutindu mosi mazono, bubu yayi, mpe kukonda nsuka, mpe Yandi ke zinga samu na kuvulusa tii na nsuka, mpe samu na kubelula muntu ya kulutila yisi, ya kubela.

⁷² Oh, mutindu ya vwandaka mpasi na suka yina, mpimpa vwandaka ya kulelika na kati ya disamba! Mu ke banza na lubungi ya ndombe. Mu ke banza ti konso dikasa vwandaka ningana ata fioti ve. Ya vwandaka ve na mupepe yina vwandaka ningana. Ya vwandaka mpimpa mpe mpasi, samu ti ba katulaka disumu.

⁷³ Kuna me kwiza Yehowa mutindu makelele ya nzasi, ke tambula na disamba, ke boka, “Adam, wapi kisika nge kele?” Ya kele ntangu Adam bakulaka ti yandi vwandaka kinkonga mpe sumukaka na ntwala ya Nzambi. Yandi bumbamaka yandi mosi mpe mekaka na kusala yandi mosi nsambulu, kasi ya simbaka ve. Nzambi kufwaka mwa dimeme, bakaka bampusu, mpe lakisaka ti kima zolaka kufwa samu na kufika disumu.

⁷⁴ Kukota na dibuundu ke fuka ata mbala mosi ve disumu. Ve funguna ya meso ya kuyuma ke fuka disumu. Ya ke lomba mawa mpe kubalula ntima, mpe lemvo ya Nzambi, samu na kufika disumu; samu na Menga ya Yesu Klisto, Yina Nzambi kufwaka na Calvaire, samu na kufika disumu.

⁷⁵ Kuna na disamba na suka yina, ntangu disumu vwandaka ndombe mingi, Yehowa kwisaka. Kuna telemaka bankwelani ya Yandi, ya kubwa. Ya ke vwanda dyaka ve na dikanda ya bantu, bawu lendaka kufwa; lufwa na zulu ya dikanda ya bantu, vutulaka yinza na kibulu ya mfinda mpe kuna ya vwandaka ve na dikanda ya bantu. Kasi na ngunga yina ya mudidi mingi, na ntangu yina kivuvu vwandaka diaka ve, ba mwangisaka lemvo kuna, yandi tubaka, “Mu ke pesa nge Mvulusi, Mesiya.” Oh, ya kele kuyituka wapi mutindu Nzambi lendaka sala yawu! Lemvo ya ngitukulu na disamba ya Eden, yina pesaka bawu

nsilulu ya Muntu ya Kudedama Yina zolaka kwiza na nzila ya kento. “Nkuna ya kento ke dyata yintu ya nyoka,” yina zabaka dyambu, “mpe yintu ya yandi ke tatika kinkoso ya yandi,” samu na kulakisa ti ya ke vwanda na mpasi na Dibuundu. Kasi Yandi silaka lunungu! Yinki pesaka Mvulusi? Lemvo!

⁷⁶ Yinki ba lendaka talisa na kuzwa lemvo? Yinki ba lendaka talisa na kusala yawu? Nzonzolo ya basoda, beno lemvokila yawu, mu zola kaka kusala yawu na chaire ya munu awa samu na kusala dibanza, “kulutisa disasi.” Adam tubaka, “Kento Nge pesaka munu salaka yawu.” Kento tubaka, “Nyoka vunaka munu.” Mosi tulaka yawu na zulu ya yina yankaka. Ya vwandaka ve na kivuvu samu na bawu.

⁷⁷ Kasi lemvo yina Nzambi kukubikaka, mpe yawu lutaka! Mpe Yandi tubaka, “Kasi mu ke sala nzila, na mutindu nyonso. Mu ke vulusa beno, ata nyonso. Beno me sala yimbi, beno me bebisa misiku ya Munu. Mpe misiku ya Munu fwana vwanda, kasi lufundusu na misiku ya Munu ba fwana sadila yawu. Na yina ya fwana vwanda na lufwa, samu ti mu me tuba ‘lufwa.’”

⁷⁸ Ntangu yayi, bankundi ya munu ya Muklisto. Mpe ba-bande yayi awa yina me salama ke mwangana na yinza ya muvimba. Bika ti mu yufula beno kima mosi, beno yina ke meka na kusala ti Nzambi kuvwanda Banzambi tatu, to beno yina ke meka na kusala Yandi kuvwanda mosi, mutindu musapi ya beno. Yandi kele mosi na kati ya muntu!

⁷⁹ Ya ke vwanda ve ya kulunga samu na Nzambi na kusala Wanzio kufwa. Yandi zolaka vwanda ve mutindu ya Zuzi ya mbote mpe kusala Wanzio kufwa samu na dikanda ya muntu. Yina ke belusaka yawu kaka ve, samu ti musiku ya Yandi ya nene ke lombaka lufwa, mpe kima fwana kufwa, mpe Wanzio lenda kufwa ve. To Yandi lendaka tuba ve, “Eve, samu nge me nata Adam na kusala yayi, Mu ke sala nge kufwa, ti Adam kuzinga,” samu ti Adam vwandaka mpe kota na diambu yango mpe.

⁸⁰ Mutindu muntu mosi tubaka, “Pilate vwandaka ya kunungisama, yandi sukulaka maboko ya yandi.” Beno lenda ve kusukula Menga ya Yesu Klisto samu na kukatula yawu na maboko ya beno. Beno ke bika ata fioti ve yinzozo yayi na suka yayi mpe beno ke kwenda na Zulu, kana beno kufwa na masumu ya beno. Ya kele na maboko ya beno. Na yawu, ya kele kieleka ve.

⁸¹ Ya vwandaka kaka na mutindu mosi. Ya kele kaka na mutindu mosi yina lendaka vwanda, musiku ya nene ya Nzambi, ke lombaka ti bawu kutana. Yandi zolaka kutana na yawu Yandi mosi. Yandi zolaka sala yawu. Nzambi kele Mpeve mpe Yandi lenda kufwa ve. Na yawu Nzambi zolaka ti ya kuma muntu, mpe Yandi kufwaka na kati ya nzutu ya muntu, na kati ya nzutu ya muntu yina ba bokilaka “Yesu Klisto,” mpe yina vwandaka Mesiya yina ba silaka yina nataka lemvo. Kuna kisika beno ke

mona ti Nzambi mpe Klisto kele Muntu mosi, Nzambi ke zinga na kati ya Klisto. “Munu na Tata ya Munu kele Mosi, Tata ya Munu ke zinga na kati ya Munu; ve Munu yina ke zonga Ndinga, kasi Tata ya Munu yina ke zingaka na kati ya Munu.” Nzambi na kati ya Klisto! Ya kieleka.

⁸² Lemvo silamaka na disamba ya Eden, mpe lemvo kwizaka, lemvo na Adam mpe Eve. Kisika ya kukwenda ve, nzila ya kubaluka ve mpe kasi lemvo salaka nzila!

⁸³ Bika mu tuba yayi, nkundi ya munu ya nsumuki. Beno lendaka vwanda awa na suka yayi kento ya kindumba, beno lendaka vwanda awa na suka yayi bakala yina ke landaka bakento, beno lenda vwanda awa kinwa-malafu to muntu ya bansaka ya mbongo, to muntu ke kufwaka bantu. Beno lendaka vwanda awa mutindu bakala ya luvunu, kento ya yimbi. Beno lendaka vwanda muntu ya kulutila yimbi ya nsumuki. Beno ke tuba, “Mu me luta kitezo yina ya mpulusu.” Ve, beno kele ve, to beno zolaka vwanda ve na dibuundu na suka yayi. Lemvo ke sala nzila samu na beno na ngunga yayi ya mudidi kana beno ke ndima yawu kaka. Adam zolaka ndima yawu, mutindu mosi beno. Beno ndima yawu.

⁸⁴ Lemvo ya Nzambi mwanganaka kuna na ntangu ya Noé. Noé, kaka muntu mutindu bantu nionso, yandi na dibuta ya yandi. Kasi samu ti Noé vwandaka na boma ya Nzambi, yandi kwikilaka Nzambi! Beno lenda ve kuvwanda na boma ya Nzambi kukondwa kukwikila. Wapi mutindu beno lenda vwanda na boma ya kima yina beno ke kwikilaka ve? Beno fwana vwanda na boma ya Nzambi. Salomon tubaka, “Boma ya Nzambi kele mbandukulu ya ndwenga.” Ntangu yayi, kaka samu na boma ya Nzambi, beno ke banda na kuzwa ndwenga. Mpe boma ya Nzambi, Noé vwandaka na boma ya Mfumu mpe yandi kwikilaka Mfumu. Mpe yawu yina Nzambi ke zitisa, ya kele lukwikilu ya beno na Yandi. Ya kele kieleka. Na yina ntangu boma ya Nzambi kwizaka na zulu ya Noé, Nzambi bokilaka yandi na nzila ya lemvo, mpe vulusaka yandi mpe yinzo ya yandi samu ti ya vwandaka lemvo yina salaka yawu. Ve samu ti Noé vwandaka muntu ya nene ya kitoko kulutila bayankaka nionso, ve samu ti Noé kwendaka na dibuundu ya kulutila kitoko yina vwandaka na yinsi, ve samu ti yandi vwandaka ya kulutila mbote na organisation, ve samu ti yandi zolaka lwata mbote, ve samu ti yandi vwandaka na mbongo mingi, ve samu ti yandi vwandaka muntu mosi ya mutindu yankaka. Kasi samu na lemvo ya Nzambi, Nzambi vulusaka Noé. Lemvo vulusaka Noé (bisalu ya yandi ve; kasi lemvo ya Yandi) mpe me vulusa dibuta ya yandi.

⁸⁵ Beto ke bokila muntu yankaka kisika lemvo ya Nzambi tandamaka, mingi na kati ya bawu, beto ke tubila yawu kaka mwa fioti. Abraham. Abraham, muntu ya kuswaswana ve, kulumukaka na yinzo-zulu ya Babel, mu banza katukaka na nkonga ya biteki (tata ya yandi), na yisi kuna na kati ya yinsi

ya Shinar na yisi kuna, samu na kuzinga na mbanza ya Ur. Mpe na yina yandi vwandaka kuna, Nzambi zonzaka na yandi na nzila ya lemvo. Ve samu ti yandi vwandaka luswaswanu, ve samu ti yandi vwandaka muntu ya kulutila mbote; kasi, na nzila ya lemvo, Nzambi bokilaka yandi. Biblia ke sala yawu pwelele. Oh, Abraham, mutindu Abraham mekaka mvibudulu ya Nzambi! Yandi tubaka na yandi, yandi tubaka, “Abraham, bikana na yinsi yayi, kubasika na yawu ve.” Kasi kaka na ntangu nzala ke kwisa, Abraham kimaka mbangu.

⁸⁶ Abraham zonzilaka beto. Nzambi bakaka—Nzambi bakaka Abraham na nzila ya lemvo, mpe vulusaka yandi. Mpe ya kele mutindu Yandi ke bakaka beno, na nzila ya lemvo. Mpe wapi mutindu beto ke meka mvibudulu ya Yandi? Bubu yayi beto kele na zulu, mbasi beto kele na yisi. Kilumbu mosi beto ke kwikila, kilumbu yina ke landa beto ke kukiyufula. Bubu yayi beto kele Methodiste, mbasi beto kele Baptiste. Bubu yayi beto ke kwikilaka na kubeluka ya Kinzambi, mbasi mpasi ya kivumu ke kwisa mpe beto zaba ve kana beto ke kwikila yawu to ve. Kasi dyaka na kati-kati ya nyonso yina, Nzambi zola ti beto bikana ya kutelama. Kasi Yandi ke vulusa beto, na mutindu nionso. Kana ya vwandaka ve lemvo ya Nzambi, beto nionso ke kwenda. Ya kieleka. Nzambi ke vulusa beto na nzila ya lemvo ya Yandi.

⁸⁷ Abraham zolaka bikana na yinsi yina, kasi yandi kwendaka na ba-Chaldéen, to, ba-Chaldéen ve, kasi ba-Philistin. Yandi kulumukaka kuna samu na kuvwanda, samu na kubasika na nzala. Bima vwandaka mwa mpasi mingi na yinsi ya yandi, na yina yandi kwendaka kuna na nzietelo kuna na bawu. Salaka kieleka yina Nzambi tubaka na yandi na kusala ve, kasi dyaka lemvo ya Nzambi monikaka na yandi, yandi kebaka Pharaon na ku-. . .to—to ntinu na kubaka kento ya yandi. Lemvo ya Nzambi. Ntangu Abraham tubaka, “Ya kele mpangi ya munu ya kento,” yandi vunaka samu na yawu, kasi dyaka lemvo ya Nzambi simbaka yandi samu ti yandi baluluka ntima. Yandi vwandaka zola kubalula ntima.

⁸⁸ Mpe muntu nyonso yina zola kubalula ntima, lemvo ya Nzambi ke kwenda kaka samu na beno. Lemvo ya Nzambi ke na kusosaka beno. Na yawu, yina ke kwenda samu na beno bantu yina me vutuka na manima na suka yayi, lemvo ya Nzambi ke na kuingila kaka beno. Kana beno ke balula bantima ya beno, lemvo ya Nzambi kele ya kulunga.

⁸⁹ Yinki mutindu Yandi bakaka ya mbote ya kiboba Abraham, vutulaka yandi! Mpe beno bambuka moyo, Abraham vulukaka ve na nzila ya bisalu ya yandi, yandi vulukaka na nzila ya lemvo. Abraham vulukaka na nzila ya lukwikilu, yina kele lemvo. Mpe Nzambi vulusaka Abraham samu na lemvo ya Yandi, ve samu na nkadulu ya yandi. Yandi vulusaka yandi samu na lemvo ya Yandi. Oh, wapi mutindu mbote! Yandi vulukaka na nzila ya lemvo.

90 Beto baka Israël. Mu kele na Masonuku ya kusonama awa. Mu ke sonika yawu mpe mu lenda tala kaka yawu na dibanza ya munu. Kana beno zola kusonika yawu, yayi ke vwanda mbote na kubambuka moyo kana beno zola, Deutéronome 7:7. Nzambi pesaka Abraham nsilulu ya Yandi, to pesaka Abraham ve, beno lemvo kila munu, pesaka Israel. Mpe tubaka na bawu, “Kana beno ke vukana ve na kusambila biteki! Kana beno ke sala bima yayi ve! Kana beno ke vwanda ntama na mikembo yayi nionso ya mimpani! Kana beno sala bima yayi nionso, na yina mu ke nata beno na yinsi ya mbote, mu ke keba beno, mu ke pesa beno madia, mu ke twadisa beno. Mu ke sala bima yayi kana beno ke sala yayi-mpe-yayi, kana beno ke zola Munu, kana beno ke zitisa Misiku ya Munu, misiku ya Munu, bandongosolo ya Munu. Mu ke sala bima nyonso yayi kana beno ke sala kaka kima mosi, mpe ke zitisa Misiku ya Munu mpe ke zola Munu.”

91 Kaka mutindu bakala ke na kubaka kento, mpe kutuba, “Kana nge ke vwanda kento ya mbote, kana nge ke keba yinzo, kana nge ke vwanda kieleka na munu, kana beno bumba bilele ya munu ya kutsyema; kana beto kele na bana, kana nge ke vwanda mama samu na bawu; kana beno ke sala bima, mu ke sala tii maboko ya munu ke basisa menga, samu na kusala beno kuzinga, kana beno ke sala yawu.” Kasi na yina, beno banza, yinki kana kento yina me baluka, ke zinga ya koyi-koyi, yandi ke sala kima mosi ve, yandi ke sala kima mosi ve? Na yina ya ke lomba lemvo na kukeba dibuta yina kintwadi.

92 O Nzambi! Ya bakaka lemvo ya Yehowa samu na kukeba dibuta ya Yandi kintwadi. Mpe ya kele kaka mutindu yina beto kele dibuta ya Yehowa bubu yayi, ya kele samu na lemvo ya Yesu Klisto; beto nionso ke kwenda. Kasi ya kele lemvo, oh, lemvo!

93 Ntangu yayi, kasi bawu bumbaka yawu ve. Kasi bawu vwandaka, bawu kwisaka ata fioti ve na nsilulu ya muvimba; nsungi yina ve. Ve, yina ba pesaka nsilulu, kufwaka na ntoto ya kuyuma. Kasi Nzambi pesaka bawu madia, Nzambi kebaka bawu, Nzambi zolaka bawu, Yandi kwendaka bisika nionso. Samu na yinki? Lemvo ya Yandi salaka yawu, lemvo ya Yandi samu na nsilulu ya Yandi, nsilulu ya Yandi na ntangu yina, lemvo yina kwendaka na nsilulu ya Yandi. Kasi ata mbala mosi ve ti bawu kumaka na kufuluka ya luvalu ya yinsi ya nsilulu.

94 Mpe dibuundu yayi ke kwisa ve na kufuluka ya luvalu ya yawu. Lemvo ya Nzambi me simba beto. Kasi Yandi zola kuzwa dibuundu yina ke tumama na Yandi, bantu yina ke baka Ndinga ya Yandi mpe ke tuba “Ya kele Kieleka,” ata ti organisation ya beno. Yandi zola bantu yina ke tuba ve, “Mbote, mu kele kaka mbote mutindu beno kele. Mu kele Presbytérien, mu kele Methodiste, mu kele Katolika, mu kele mbote mutindu beno kele.” Yina kele lemvo ve; yina ke lakisa ti ya kele na kima mosi ke tambula mbote ve.

⁹⁵ Kasi muntu, ata mutindu yina, yina ke tanga Ndinga ya Nzambi mpe ke mona ti beno fwana butuka mbala zole mpe ya kufuluka na Mpeve-Santu, bawu ke kwikila yawu, bawu ke baka yawu na nzila ya Ndinga. Ba ke baka Ndinga kieleka yina Yawu me tuba.

⁹⁶ Mutindu na bambotika mpe kumwangisa maza; mbotika kele ya kulunga. Ya kele ve na muntu na kati ya Biblia yina ba me mwangisaka mwa maza, ata kima ya mutindu yina na kati ya Masonuku. Ata muntu mosi ve bakaka mbotika na nkumbu ya “Tata, Mwana, Mpeve-Santu,” na kati ya Biblia. Bawu vwandaka, mosi na mosi, botamaka na Nkumbu ya Yesu Klisto. Na yawu ya kele ve na mosi, ata kitini ya disolo ve samu . . . Kana muntu lenda lakisa kisika nyonso, kisika nyonso na disolo, kisika muntu botamaka ntete na Biblia, to bankama tatu ya bamvula na manima ya lufwa ya kilandi ya nsuka, tii kuna dibuundu ya Katolika, kana muntu mosi lendaka talisa kisika yina ba mwangisilaka muntu mosi masa to ba botikaka na nkumbu ya “Tata, Mwana, Mpeve-Santu,” tii na dibuundu ya Katolika, beno kele na ksalu ya moyo na kwiza kutuba na munu. Ya kele kuna ve. Kasi yinki beto ke sala?

⁹⁷ Beto vwanda luta na kati ya *Basungi ya Dibuundu* mpe monaka kisika ba zolaka sala yawu. Na yawu, beno me mona, Nzambi zola muntu yina ke tumama na Yandi. Kana ya kele ve na kati ya Masonuku, na yina ya kele ve muntu . . . ya kele malongi ya muntu mpe ve Malongi ya Biblia. Beno me mona? Na yawu ata mutindu nyonso yina dibuundu kele, yinki mutindu yimbi beno vwandaka, wapi luswaswanu ya ke sala? Ya kele mutindu kieleka beno lenda vwanda ntangu yayi! Lemvo ya Nzambi me lakisa yawu na beno, na yina beno tambula na kati ya yawu. Lemvo ya Nzambi!

⁹⁸ Beno bambuka moyo na Moise, mpe, ntwadisi yina ya nene. Nzambi zolaka kufwa yandi ntangu yandi kwendaka kuna samu na kukembila yandi mosi na kubulaka Ditadi yina, mpe yandi tubaka, “Beno me mona yina mu lenda sala?” na nzonzolo yankaka. “Beno bimpumbulu, beto fwana basisila beno masa na Ditadi yayi?” Mpe yandi bulaka Yawu mpe bamaza kwizaka ve; yandi bulaka Yawu dyaka. Yinki yandi salaka? Yandi pesaka kimbangi ya kulemba ya—ya Klisto, samu ti Klisto vwandaka Ditadi yina. Yina kele Ditadi ya yintu. Na kisika ya kubula yawu, to kuzonza na yawu . . .

⁹⁹ Ba bulaka yawu mbala mosi. Beno bambuka moyo, Nzambi tubaka na Moise kuna na Exode, “Kwenda kuna mpe mu ke telema na ntwala—na ntwala ya nge, na zulu ya Ditadi, mpe bula Ditadi.” Mpe yandi bulaka Ditadi mpe Yawu basisaka bamaza. Nzambi tubaka, “Ntangu ke kwisa, kwenda tuba na Ditadi mpe Yawu ke basisa masa ya Yawu.”

¹⁰⁰ Kasi Moise zolaka kulakisa ti yandi vwandaka na mwa

lutumu, mwa ngolo, na yawu yandi tubaka, “Mu ke basisa nge maza na Ditadi yayi.” Nzambi zolaka kufwa yandi, samu na yawu. Nzambi zolaka kabula yandi, ti yandi bukaka musiku ya Nzambi kaka kuna, samu ti yandi zonzaka na kulemba ya Klisto, ba fwana bula Yandi mbala zole. Ba bulaka Klisto kaka mbala mosi. Ntangu yayi beto ke tuba na Ditadi, mpe Yawu ke basisa bamasa ya Yawu.

¹⁰¹ Kasi yinki ya vwandaka? Beto tala kiboba ya bakala, yandi kele na bamvula nkama mpe makumi zole.

¹⁰² Muntu mosi tubaka na munu ntama mingi ve, yandi tubaka, “Nzambi kele Nzambi ya mbote ve,” yandi tubaka, “samu Yandi bikaka Moise kubwa. Na manima yandi salaka na ba-Hébreux yayi bamvula makumi yiya na ntoto ya kuyuma yina kuna, Yandi bikaka yandi mpe na yina yandi lendaka ve kubika yandi kukota na yinsi ya nsilulu.”

¹⁰³ Mu tubaka, “Oh, buzoba!” Ve, Yandi bikaka ve Moise kuna. Yandi kwendaka na yinsi ya nsilulu. Pene ya bamvula bankama sambwadi na manima, ba monaka yandi na zulu ya Mongo ya Nsobolo, mutindu moyo mutindu yandi vwandaka ntete, ya kutelama, vwandaka zonza na Yesu ntete Yandi kwenda na Calvaire, yandi mpe Elie, ya kutelama kintwadi, vwandaka zonza, mpe. Moise na Elie monikaka na Yesu, Pierre, Jacques na Jean, na Mongo ya Nsobolo. Yandi kufwaka ve. Yandi vwandaka moyo. Nzambi bikaka yandi ve kubwa kuna. Yandi vwandaka na kati ya Palestine.

¹⁰⁴ Ntangu yayi beno tala, ntete yandi kufwa, yandi mataka na Mongo ya Nebo, na suka yina ntangu yandi zabaka ti yandi vwandaka kwenda. Yandi katulaka Aaron, tulaka bilele ya yandi na zulu ya yankaka. Bakaka mvwela ya yandi mosi, tulaka yawu na zulu ya Josué, tumaka yandi na kubikana na misiku yina! Mpe ntangu yandi mataka kuna na nsongi ya Mongo Nebo, yandi kwendaka kuna na kati ya kiwanda ya balepele, na kuzabaka ti yandi zolaka kwenda kuna samu na kufwa, mpe mataka na zulu ya Mongo Nebo, mpe tii na Pisgah. Mpe na ntangu yina yandi vwandaka kuna, Nzambi tubaka, “Tala kuna na yinsi. Mu zola ti nge mona yawu. Moise, nge lendaka kwenda kuna. Kasi beno zaba yina beno salaka kuna na Ditadi kilumbu yina? Nge me kukikembisa nge mosi.” Mu banza ti yawu yina ke vwanda mpasi ya nene na mingi ya beto bubu yayi. “Kulumuka kuna na Ditadi, mpe nge me kukikembisa nge mosi.” Kasi beno tala ntangu yandi kubamaka samu na kufwa, Ditadi telemaka kuna. Yandi zolaka tambula kaka na zulu ya Ditadi kuna na Pisgah, mpe Nzambi zikaka yandi. Kasi yandi zolaka vumbuka diaka, kisika mosi kuna, samu yandi vwandaka ya moyo. Yandi vwandaka kifwanikusu ya Klisto. Kuna yandi vwandaka, ya kutelama na Mongo ya Nsobolo, bankama ya bamvula na manima, kuna na kati ya Palestine. Beno me mona, lemvo ya Nzambi kubikaka Ditadi. Oh, la la!

¹⁰⁵ Ntangu mu ke banza na Abraham, na bifu nionso yina yandi salaka, mpe Moise na kifu ya yandi, kasi ntangu mulabu ya Abraham sonamaka, ntangu mulabu ya Kinzambi sonamaka, ntangu Paul sonikaka mulabu ya Abraham, yandi tubaka ata mbala mosi ve kima mosi na yina me tala kukondwa lukwikilu ya Abraham. Ve, ve, ata mbala mosi ve ti ba tubaka na yandi. Yandi tubaka, “Abraham tulaka ntembe ve na nsilulu ya Nzambi na nzila ya kukondwa lukwikilu, kasi yandi vwandaka na ngolo, yandi vwandaka pesa lukumu na Nzambi.”

¹⁰⁶ Kisambu ya munu ya kukikulumusa kele, na ntwala ya lemvo ya Nzambi yina kele awa na suka yayi, Mu banza ti ba me sonika ya munu mutindu yina, ti Yandi ke mona ve bifu ya munu. Ti ntangu mulabu ya munu kele ya kusunika, lubambuku ya munu, ti ba ke tanga yawu ve ti mu salaka bifu mpe salaka yimbi, kasi Yandi ke mona kaka bima yina mu mekaka na kusala samu na Yandi. Bika bawu kuma kaka . . . Yinki yawu ke sala? Yandi ke baka lemvo ya Nzambi yina mu ke kwikilaka. Mpe ya kele kisika mu ke tulaka kivuvu mingi. Samu ti na zulu ya makuki ya munu mosi mu lenda kota dyaka ve na kisika ya kupema, kasi na zulu ya lemvo ya Nzambi mu ke na kusalaka. Yinga, ya kele lemvo yina mu ke na kusalaka.

¹⁰⁷ Ya vwandaka na Ditadi kuna ntangu Moise kubamaka samu na kufwa.

¹⁰⁸ Yinki beto lenda tuba samu na David? Lemvo ya Nzambi! Munwani-mvita yina ya nene na yina Nzambi Yandi mosi . . . Yandi tubaka, “Yandi kele muntu na manima ya ntima ya Munu Mosi.” Munwani-mvita yina ya nene, David, wapi mutindu yandi lendaka sala kima ya mutindu yina, samu na kubaka Urie, soda ya yandi, ntangu yandi kuzwaka kikunku ya Bantu ya makanda kuna mutindu basoda? Beno kuwa mbote mwa disolo yayi kaka mwa ntangu fyoti. Ntangu bawu kuzwaka basoda ya bawu na ngaanda kuna, mpe Urie vwandaka mosi yina vwandaka ya kutelema na lweka ya David. Urie vwandaka mundimi ya malu-malu, yandi vwandaka Hittite, mundimi ya malu-malu samu na nsambulu ya ba-Juif. Mpe bantu yango zolaka David mingi! Bawu monaka ti kupakulama vwandaka na zulu ya yandi, ata ti yandi vwandaka—yandi vwandaka muntu ke tinaka. Ba losaka yandi na ngaanda ya yinsi ya yandi mosi, zolaka zinga na ba-Philistin. Saül vwandaka zomba yandi. Kasi dyaka bantu yango, bawu monaka kupakulama na zulu ya yandi! Bawu zabaka ti yandi vwandaka kota na kati ya luyalu. Nkembo na Nzambi!

¹⁰⁹ Mu kele na kyese mingi na kuvwanda muntu ke tina bubu yayi, samu ti mu ke mona ti Klisto ke na kwiza samu na kuvwanda Ntinu. Beno lenda sola nyonso ya Kennedy mpe nyonso yankaka yina beno zola. Kasi Klisto ke vwanda Ntinu! Kupakulama kele na zulu ya Yandi, na zulu ya Nsangu ya Yandi ya Nkwizulu ya Yandi. Mpe Yandi ke vwanda Ntinu!

¹¹⁰ Yinki bawu salaka? Kilumbu mosi yandi vwandaka kuna na mpwila ya masa na mwelo kuna na Bethlehem, kisika yandi vwandaka kwenda kusansa mameme. Mpe beno zaba yinki? Zole ya babakala yayi bakaka bambele mpe zengaka na bakilometele makumi zole na yiya ya nsuni ya muntu, samu na kuzwa kantini ya masa. Samu ti, mbote, nsatu ya yandi ya fyoti vwandaka lutumu samu na bawu. Beno banza na yawu! Mpe ba lutaka na kati-kati ya bantu yango, nzila nyonso na zulu ya mongo yina kisika ba tubaka ti yandi vwandaka ya kutelama, ya lendaka vwanda na kutala bakilometele makumi zole na yiya. Bawu lutaka na kati kuna. Mpe bakala nionso vwandaka telama, ba vwandaka bula yandi tii kuna ba kufwaka yandi. Bawu kwendaka! Mpe mu bakaka kantini yayi mpe mu bakaka kantini ya masa, kaka na kati ya nzila ya mbeni, babakala zole, samu na kuzwa maza ya ntinu ya bawu, mpangi ya bawu ya bakala, maza ya kunwa. Na yina, yandi vwandaka na maza kuna samu na kunwa, kasi yandi zolaka masa *yina*.

¹¹¹ O Nzambi, bika mu baka Mbele ya Ndinga mpe mu pasula na kati ya organisation nionso, samu na kunata mbotika na Nkumbu ya Yesu Klisto, mpe Ngolo ya mvumbukulu mpe Mpeve-Santu, kuvutuka na bantu, ata mutindu nyonso... samu ti Yandi ke kota na luyalu. Yandi ke kuma na luyalu, Yandi ke telama yandi mosi. Kasi Yawu lutaka na kati-kati ya konso organisation, lutaka na kati-kati ya ba-theorie, ba-credo nionso me salama na maboko ya bantu, tii kuna beno ke vutula na Mvulusi dimeme yina me zimbana, muntu mosi, kuvutula dyaka Malongi ya Biblia, ya Yesu Klisto mutindu mosi mazono, bubu yayi, mpe kukonda nsuka. Lemvo ya Nzambi!

¹¹² Beno tala David. Wapi mutindu yandi zolaka sala... Mosi dumukaka na dibulu mpe kufwaka nkosi. Wapi mutindu David lendaka baka kento ya Urie, Bathsheba ya kulutula kitoko, ntangu yandi vwandaka na bakento bankama tanu ya yandi mosi? Kasi yandi monaka yandi ke na kuyobila. Mpe yina kele kukondwa kukipe diambu. Ntangu yayi, yandi zimbanaka na kukulumusa banela ntangu yandi vwandaka kuyobila, mpe zabaka ti ntinu salaka nzietolo kuna, na yina, konso kilumbu, kuna na kibaka yina.

¹¹³ Yawu yina diambu. Mu ke banza ve ti bakento bubu yayi ke monaka mpamba mingi to nionso yina, mbote, bawu ke basika kaka kinkonga, kaka yina, na babala-bala, mwa bilele ya ntama. Ya kele nsoni! Mpe na manima ba ke kukiyufulaka samu na yinki babakala ke bulaka lusibu mpe ke bulaka sifflet. Oh, ba ke salaka yawu samu na kunata babakala na kubula lusibu mpe kulandila. Ba zaba yawu, ba ke na sense mingi samu na kuzaba yawu. Ba ke salaka yawu kaka samu ti bawu zola. Ya kele na kati ya ntima ya bawu. Beno ke tuba na bawu ti bawu kele na nkadulu ya kukondwa buzitu, bawu lenda swana na yawu. Kasi ba lendaka vwanda ve na nkadulu ya kukondwa buzitu, ba

lendaka vwanda ya kuvedila mutindu lis, ntangu ya ke kuma ya kuvukisa banzutu. Kasi, beno bambuka moyo, ya kele na mpeve na zulu ya bawu, kupakulama yina ya dyabulu, ke fidisa moyo mosi na difelo. Beno bambuka moyo, Biblia ke tuba, “Muntu nyonso yina ke tala kento, samu na kulula yandi, me sala kinsuza na yandi na kati ya ntima ya yandi yimeni.” Mpe beno bambuka moyo, mpangi-kento, nge ke pesa mvutu samu na kusalaka pité ata ti nge me salaka yawu ntete ve na luzingu ya nge nyonso, kasi nsumuki yina talaka beno mutindu beno lwataka, ke vwanda ya kubwa na pité. Beno ke pesa mvutu na Kilumbu ya Lufundusu, samu na kusalaka pité. Ntangu yandi fwana kutuba. . .

¹¹⁴ Yandi ke tuba awa, Yandi sonikaka na Buku ya Yandi, “Na kusalaka pité.”

“Na nani?”

“Mama John Doe.”

“Na yina, Mama John Doe, wapi mutindu samu na yawu?”

¹¹⁵ “Mu ke zenga ndefi ti mu. . . Beno zaba kimbangi ya munu, mu me zingaka ata fioti ve na bakala yankaka kasi bakala ya munu mosi.”

¹¹⁶ “Kasi beno me lwata na mutindu ti beno me sala ti bakala yayi kusala pité. Mpe beno kele ya kuzaba dyambu na yandi. Ya kele ntangu yandi salaka yawu. Ba fwana kusemba beno, beno vwandaka yina kukitalisaka beno mosi.”

¹¹⁷ Bathsheba salaka yimbi kaka mutindu Eve salaka yimbi, kasi Adam kotaka na kati ya yawu. Mu banza ti beto ntangu nyonso ke bokaka na bakento, mpe. Beno bana ya Nzambi, babakala. Mu zaba ti beno kele nkonga ya kulutila ngolo, ya kele kieleka, ya kulutila ngolo na nzutu. Beno kele na zulu ya bakento, ya kele kieleka, ya ke sala mutindu yina. Beno zenga yawu ve, beno ke meka na kubaka mwa mwana ya kento mpe beno bebisa luzingu ya yandi. Kasi beno vwanda mwana ya bakala ya Nzambi, beno tuba na yandi ti yandi kele na yimbi, mpe beno telama mutindu mwana ya Nzambi. Yandi kele mpangi ya beno ya kento. Yinga, tata. Yina beto ke meka na kusala, yina ba ke bokilaka bana-babakala ya Nzambi bubu yayi, kele bamambele ya mabuundu, ke basisa na ngaanda bana-bakento nionso bawu lendaka. Beno bambuka moyo, samu ti ya kele na kento ya kukondwa buzitu yina lenda vwanda samu ti bakala mosi ya kukwela me bebisa yandi, mpe. Na yawu, nzungu lenda bokila ve kikalungu ndombe, na yawu beno bambuka kaka moyo. Ya kele disumu yina ke salaka yawu nyonso. Mpe beto nyonso kele ya kufwa, mpe fwana kufwa samu na yawu.

¹¹⁸ Ntangu David salaka kima ya yimbi yina, lufundusu ya yandi mosi zolaka kufwa yandi. Ntangu profete yina kwisaka kuna, yandi banzaka ti ya vwandaka ya kubumbama. Ntangu profete yina kwisaka kuna mpe telemaka na ntwala ya yandi, yandi tubaka, “David, bima nionso ke tambula mbote?”

Yandi tubaka, “Bima nyonso kele mbote.”

¹¹⁹ David, na bamvwela ya yandi ya zulu mpe yimpu ya kimfumu ya yandi ya nene, mpe yandi vwandaka na Joab kuna, mfumu ya yandi ya nene, mpe kunwana nionso vwandaka landa kaka. Yandi vwandaka bumba bambeni nionso na nganda ya bandilu ya yinsi mpe nionso yina, bima nionso vwandaka tambula mbote. Yandi kuzwaka bébé na nzila ya Bathsheba. Mpe yandi fidisaka ntwenya Urie kuna, mpe kuzwaka Joab na kutelema pene-pene ya yandi, tii kuna yandi bikaka yandi. Mpe—mpe—mpe mwana-bakala yango kufwaka ntangu mwini dindaka, na mbele ya bitumba na diboko ya yandi, menga na zulu ya kinwaninu ya yandi ya kisengo, kisika yandi telemaka samu na Israël, kasi yandi vwandaka mundimi ya malu-malu samu na nsambulu ya bawu. Na yina ntangu Joab vutukaka mpe tubaka na yandi ti—ti David kufwaka. . . ti—ti Urie kufwaka, David banzaka, “Bima nyonso kele mbote ntangu yayi. Mu kele na kento ya yandi, mpe nyonso ke vwanda mbote. Yandi me kuzwa bébé.” Kasi bébé yango bakaka kimbevo. Bébé bandaka na kufwa. Mpe yandi salaka nyonso yina yandi lendaka samu na kuvulusa luzingu ya bébé, mu banza ti konso dokotolo kwizaka. Ata mbote ve. Na nsuka ya nyonso, bébé kufwaka. Ba vwandaka na boma ya kutuba na David ti bébé yango kufwaka. Mpe yandi kufwaka. Na yina yandi banzaka ti bima nionso vwandaka ya kubumbama. Na yina yandi kindisaka Bathsheba. Yandi bakaka ntete yandi mutindu kento ya yandi, na manima ya bakento yankaka yina nionso.

¹²⁰ Profete yayi ya kiboba, ya dibandi kwisaka, kiboba ya Nathan, na ntoto ya kuyuma, yandi vwandaka, yandi tubaka, “David, wapi mutindu bima nionso ke tambula?”

¹²¹ Yandi tubaka, “Mbote! Mbote! Kiboba ya profete ya Nzambi, ke zinga ntangu nyonso! Alleluia!” Oh, yandi vwandaka kaka. . . Yandi banzaka ti nyonso vwandaka mbote, yandi banzaka ti yandi lendaka bumba yawu.

¹²² Kasi beno lenda bumbama ve na Nzambi! Yandi zaba yina beno ke banza na ntangu yayi. Yandi zaba mabanza ya beno, samu ti Yandi kele Nzambi. Mpeve-Santu yina kele na kati ya kivinga na suka yayi, zaba mabanza ya beno, nani nge kele, kisika nge me katuka, yina nge me sala, samu ti Yesu Klisto kele mutindu mosi mazono, bubu yayi, mpe kukonda nsuka.

¹²³ Nzambi monisaka yawu na profete yina. Yandi tubaka, “David, ya vwandaka mvwama yina zingaka na lweka *yayi* ya nzila, yandi vwandaka na mameme mingi, oh, yandi vwandaka kieleka mvwama. Muntu mosi zingaka na lweka *yayi* ya nzila, vwandaka mputu, yandi vwandaka na mwana-dimeme mosi. Yandi vwandaka kubaka yawu mutindu mwana-kento. Yandi disaka yawu na lutu mosi yina yandi kudiaka. Yandi lalaka na mwana-dimeme. Bima nionso vwandaka kaka. . . Ya vwandaka

kaka mutindu mwana-kento samu na yandi. Mpe kilumbu mosi nzenza mosi kwisaka, na yina, na kisika ya muntu ya mvwama na kubaka mosi ya mameme ya yandi mosi mpe salaka feti samu na nzenza yango, mbote, na kisika ya yina, yandi kwendaka kuna mpe bakaka mwana-dimeme ya muntu ya mawa, mpe na nzila ya ngolo, bakaka mwana-dimeme mpe kufwaka yawu, mpe salaka feti.”

¹²⁴ Ntangu yayi, yina vwandaka bansatu ya David. Yandi vwandaka na bakento bankama tanu, kasi ntangu yandi monaka kento ya Urie, na kisika ya kubaka mosi ya bakento ya yandi bankama tanu, samu na kulembika to kusepelisa bansatu ya yandi, yandi kwendaka, bakaka kento ya bakala yayi yankaka, na manima yandi kufwaka Urie na manima kento kumaka na kivumu. David zabaka ve yina yandi vwandaka sala, na yina, David vwandaka ya kukubama samu na kutuba lufundusu. Ya kele mutindu beto kele. Beto lenda ntangu nyonso kufundisa muntu yankaka, kasi ntangu ya ke kwiza na beto, oh, ya ke vwanda luswaswanu.

¹²⁵ David tubaka, “Muntu ke futa na luzingu ya yandi.”

¹²⁶ Profete yina ya ntama, meso ya bawu kumaka fioti. Yandi tubaka, “David, ya kieleka nge ke kufwa ve!” Beno tala mbote lemvo kuna kukwenda sala nswalu. Mpeve bulaka profete, vulusaka luzingu ya David. Lemvo, “Ya kieleka nge ke kufwa ve, kasi mbele ke bika ve yinzo ya nge tii kuna ya ke kuma ya kuvedila na ntima ya nge. Samu ti, nge kele muntu yango ya mvwama.” Oh, ya vwandaka luswaswanu kuna, mutindu yina ve?

¹²⁷ Yinki vulusaka David, ntangu lufundusu ya yandi mosi tubaka, “Muntu ke kufwa! Yandi ke futa tii na nsuka, mpe yandi ke futa samu na yawu na luzingu ya yandi”?

¹²⁸ Mpe profete tubaka, “Ya kieleka (lemvo) nge ke kufwa ve. Nge ke kufwa ve, David. Lemvo me vulusa nge.” Ya vwandaka lemvo, na David, yina vulusaka yandi. Oh, la la!

¹²⁹ Kana ya vwandaka ve samu na lemvo, wapi kisika beto nyonso zolaka vwanda? Ya kele kieleka? Ya kieleka.

¹³⁰ Lemvo ya nene me katuka na Mosi ya nene. Lemvo ya nene me katuka na Mosi ya nene. Ya nene, yinki ya lenda sala? Ya nene lenda sala nyonso yina ya zola. Beno kuwa yayi ntangu yayi. Lemvo ya nene lenda pesama kaka na Mosi yina kele ya Nene. Mpe Nzambi kele Mfumu ya nene, na yawu Yandi lenda pesa lemvo ya nene. Na yawu na kuvwandaka ya Nene, lemvo fwana yufula muntu mosi ve, ya fwana sala yawu ve. Ya ke sala yina ya zola. Ya kele mbote ve? Ya fwana kuyufula ve, “Mu lenda sala *yayi*? To, mu ke sala *yayi*? Mu lenda? Mu fwana? Mu ke sala?” Ya ke sala yawu ve. Yawu ke sala yawu yawu mosi. Lemvo kele ya Nene, na yawu Yandi lenda vulusa muntu ya kulutula ya mpamba-mpamba, Yandi lenda vulusa muntu ya kulutula yimbi, Yandi lenda vulusa ndonga ya kulutula yimbi, Yandi lenda vulusa

muntu ya luzingu ya kulutula yimbi, Yandi lenda belusa bambevo ya kulutula. Alleluia!

¹³¹ Yandi lenda vulusa muntu ya mawa mutindu munu. Mpe Yandi salaka yawu. Yinki ya kele? Lemvo! William Branham, mwana ya kinwa-malafu. Yina ke sala luswaswanu mosi ve, lemvo ya Nzambi me vulusa munu!

¹³² “Munu, mu kele mwana ya kento ya kento yina vwandaka mbote ve.” Ya ke sala luswaswanu mosi ve, lemvo ya Nzambi vulusaka beno. Ya kele ya Nene, fwana yufula muntu mosi ve. Amen! Mu kele na kyese mingi samu na yawu. Alleluia!

¹³³ Yandi lendaka baka nsumuki ya kulutula yimbi mpe kusala yandi mpembe mutindu mvula-mpembe, Yandi lendaka ve kuyufula muntu mosi samu na yawu. Oh, Yawu lenda sala yawu samu ti Yawu kele Nene. Beno kuwa, na nswalu ntangu yayi.

¹³⁴ Yina siamisamaka na kulunsi, ntangu ya vwandaka na muyibi ya kulutula yimbi, yandi lungaka kuzwa kitumbu ya lufwa. Nzambi me kwisaka ata fioti ve na mabanza ya yandi. Yandi banzaka ata fioti ve kima mosi ya Yawu. Kuna na zulu ya kulunsi ntangu, na nzila ya bikoba yango ya menga, na kati-kati ya bantu ya mawa kuna me kwiza makelele, “Mfumum, wila munu mawa!”

¹³⁵ Mpe kuna me kwiza Mosi yankaka na nzila ya Menga, na masa ya meso, pene ya kufwa, lemvo simbaka mpe tubaka, “Bubu yayi nge ke vwanda na Munu na Paladiso.” Lemvo salaka yawu. Wapi mutindu muyibi yina lendaka sadisa yandi mosi? Ata mosi ve ti Adam lendaka kukisadisa yandi mosi, ata mpe ve ti Eve lendaka kukisadisa yandi mosi, ata mpe ve ti beno lendaka kukisadisa beno mosi, ata mpe ve ti munu lendaka kukisadisa munu mosi, ata mpe ve ti beto lendaka kukota na Nzila Ya Miliki Ya Mpembe na baboti ya beto ya kwile. Beto lenda sala yawu ve. Kasi lemvo ya Nzambi lenda sala kima mosi samu na yawu, mpe ya ke sala yawu! Lemvo ya Nzambi, bunene ya lemvo ya Nzambi, kwizaka na muyibi yina vwandaka kufwa, “Bubu yayi nge ke vwanda na Munu na Paladiso.” Oh, beno banza na yawu! Ya kele kitoko mingi.

¹³⁶ Beno banza na yawu: Zola mpe lemvo kele bampangi ya bakento, bampangi ya bakento bamapasa. Beno lenda ve kuzwa lemvo kukondwa kuzwa zola. Bawu kele bampangi ya bakento ya mapasa. Ya kieleka kaka. Ntete beno kuzwa lemvo, beno fwana kuzwa zola. Ntete kieleka beno lenda lakisa muntu lemvo, beno zola bawu; mbote to yimbi, beno fwana zola bawu, na mutindu nyonso, to beno lenda ve. Beno me mona? Na yawu zola mpe lemvo kele kima mutindu mosi. Bawu kele kaka zole bampangi ya bakento, kaka yina, zola mpe lemvo. Bawu, beto vwandaka. . . Beto lenda mona mosi ve kukondwa yankaka. “Nzambi zolaka mingi yinza, pesaka Mwana ya Yandi mosi kaka,” Yandi mwangisaka lemvo ya Yandi, mpe nataka yawu

na kati ya bantima ya beto na nzila ya Mpeve-Santu. Benome mona? Ya kele kaka na kima mosi ve yina beno lenda sala kukondwa kusala mosi na yankaka. Lemvo, lemvo ya Nzambi kele yina ke vulusa beto.

¹³⁷ Ntangu yayi beto ke mona ti, lemvo yina, kuna mutindu muyibi yina vwandaka kufwa, kuyituka ve ti ya twadisaka na kimpeve ba-poete ntangu ba monaka yawu. Poete mosi tubaka:

Muyibi yina vwandaka kufwa vwandaka na
kiese na kumona

Yinto yina na kilumbu ya yandi;

Munu yayi muntu ya mpamba-mpamba,
mutindu yandi,

Sukula masumu ya munu nyonso.

Kubanda ntangu yina na lukwikilu mu
monaka masa yina

ke basika na bamputa ya Nge,

Zola ya mpulusu vwandaka dilongi ya munu,

Mpe ke vwanda tii mu ke kufwa.

Na manima na mukunga ya kitoko, ya
lembami,

Mu ke yimba ngolo ya Nge samu na kuvulusa,

Na ntangu yinwa yayi ya mputu, lutimi yina ke
titiba

Baluvunu ke bikana swi na kati ya ntoni.

Lemvo, lemvo ya ngitukulu! Alleluia! Mosi sonikaka yawu:

Oh, zola ya Nzambi, wapi mutindu mvwama
mpe ya kuvedila!

Ya kukondwa lubakusu mpe ngolo!

Ya ke vwanda ntangu nyonso,

Nkunga ya basantu mpe ya bawanzio.

Kana beto fulusa mubu na tinta,

Mpe mazulu vwandaka buku;

Mpe konso mwinga na zulu ya ntoto kilapi ya
dinsala,

Mpe konso muntu musoniki;

Kusonika zola ya Nzambi

Ke yumisa mubu;

To buku ke lunga ve na kubumba nyonso,

Ata ti ya ke tandama kubanda zulu yayi na
zulu yankaka.

¹³⁸ Ya kele yina ya kele, lemvo, lemvo ya Nzambi. Lemvo ya Nzambi me basisa kivudi...Nzambi me nata lemvo na baluzingu ya beto na nzila ya zola ya Yandi samu na beto. Awa kele na kima yankaka lemvo lenda sala ve; lemvo lenda ve kusumbama, lemvo lenda ve kutekama. Ya kele lemvo! Ya kele na nzila ya yina Mosi me luta nyonso. Yinga, tata. Benolunga ve kuwisana samu na yawu. Benolenda tuba, "Nzambi, mu ke sala

yayi-mpe-yayi kana Nge ke sala *yayi-mpe-yayi*.” Beno lenda sala yawu ve. Nzambi ke sala yawu ve. Beno lenda basisa kima mosi ve na Nzambi. Nzambi me pesa yawu na beno na lemvo ya Yandi. Oh, oh, la la!

¹³⁹ “Ve yandi yina zola to yandi yina ke kima mbangu, kasi Nzambi yina ke na kulakisa kyadi.” Ya kele kieleka.

¹⁴⁰ Bantu ke lala na bizizi ya bawu. Mpe babakala yankaka kwisaka na munu. . . Mu ke kwikila ti mu monaka mosi ya bana-babakala yina kele awa na yinzo bubu yayi. Mwana-bakala mosi ya Methodiste kwisaka, mpe kuzwaka Mpeve-Santu, kuna na. . . Mpe bana-babakala yina kwisaka na munu, bawu tubaka, “Ntangu yayi, Mpangi Branham, ntangu yayi ti beto me kuzwa mpulusu mpe me kuzwa Mpeve-Santu, beto ke kwenda na kusosa makabu?”

Mu tubaka, “Kusala yawu ve. Kusala yawu ve.”

¹⁴¹ Nzambi ke pesaka makabu ya Yandi na kimpwanza. Makabu mpe balubokilu ba ke sobaka yawu ve. Kima ya ntete beno zaba, beno kwenda na kusosaka kima mosi, “Nzambi, Nge ke pesa munu kaka mulongi, Nge ke sala kaka *yayi* na munu,” mpe yinki nge ke vwanda? Simisi ya nene, yimeni. Beno ke kwenda na mwa théologie ya bantu mpe mwa organisation mosi, mpe kuna beno ke diama mpe ke kuzwa bimbevo. Bika ti Nzambi kusala lubokilu. Nzambi ke bokila beno, Nzambi ke santisa beno, Nzambi ke pesa nge yina Yandi ke vwanda na yawu nsatu ya kupesa nge. Yinga, tata.

¹⁴² Beno lendaka ve kuwisana samu na kuzwa lemvo. Ve, tata. Beno, ba lendaka ve kutekisa yawu, ba lendaka ve kuwisana na yawu, to ba lendaka ve kusumba yawu, ba lendaka ve kusala mumbongo na yawu. Beno lenda tuba ve, “Mbote, ntangu yayi, Mfumu, mu ke kota na dibuundu yayi ya nene ya ba-Baptiste, to dibuundu yayi ya nene ya ba-Methodiste, to dibuundu yayi ya nene ya ba-Pentecotiste, to dibuundu yayi ya nene ya ba-Nazaréen. Mu ke sala *yayi* kana Nge ke sala kaka *yayi* samu na munu.” Ya lendaka wisana ve. Ve, tata.

¹⁴³ “Nyonso yina Tata pesaka Munu ke kwiza na Munu. Muntu ve lenda kwiza kana ti Tata ya Munu kubokila yandi ntete ve.”

¹⁴⁴ Beno me kuma kaka mambele ya dibuundu ya dibuundu yina ya nene, yimeni, beno ke kuzwa mpulusu ve. Lemvo fwana vulusa beno. Bamayeleye ya beto lendaka ve kupema, mpe bamayeleye ya beto lendaka ve kuvwanda ya beto—ya beto. . . Bamayeleye ya beto yina beto me kuzwa, beto lendaka kuzwa ve lemvo na nzila ya bamayeleye ya beto.

¹⁴⁵ Kana Nzambi salaka munu mulongi, yina ke lakisa ve lemvo ya Yandi me vwanda na munu. Ve, ve. Ya kele lemvo ya Yandi mosi yina vulusaka munu. Ve samu ti mu ke longaka Nsangu ya mbote, mu me kuzwa mpulusu. Ve samu ti beno ke zonga na bandinga, beno me kuzwa mpulusu. Oh, ve. Ve samu ti beno,

samu ti beno ke longaka. Beno me vulukaka kaka ve samu beno ke longaka. Beno me—beno me vulukaka ve samu beno ke tuba bandinga ya malu-malu. Beno kele ya kuvuluka ve samu ti beno ke salaka mosi ya bima yayi. Ya Ntete ya Corinthiens 13 ke lakisa yawu, “Ata ti mu ke zonza na bandinga ya bantu mpe ya Bawanzio, ata ti mu me bakula mansweki nyonso ya Nzambi (mulongi), ata ti mu ke sala nionso *yayi*, mpe mu ke vwanda na lukwikilu ya kukatula myongo, mu ke na kima mosi ve tii kuna zola ke kota, yina ke zola.” Zola kele lemvo. Lemvo ya Nzambi yina ke salaka nyonso.

¹⁴⁶ Bantu yankaka, beno kele na mayele mutindu mwa bantinu yayi ya rock-and-roll. Yina ke sala munu kimbevo na munu, mu zaba ve, kudya mingi ya munu ya kimpeve. Mu ke tuba na beno, ntangu mu ke kuwa rock-and-roll yayi na Kilumbu ya sambanu na nkokila mpe kuyimba rock-and-roll, mpe kubina mpimpa nyonso, mpe na yina suka yina landaka kwisaka kutana na nkonga ya bantu mpe bima ya mutindu yina na kumeka na kutalisa kizizi ya yinda ya busantu, mpe ke telama kuna na ntuala ya bantu mpe ke yimba nkunga mosi, mpe ke banza ti bawu ke kwenda na Mazulu. Mu lendaka bokila bankumbu mingi, kasi mu fwana ve. Bande yayi ke kwenda bisika nionso. Kasi beno nionso zaba. Mwana-bakala mosi awa ntama mingi ve, na Hollywood, yandi lendaka ve kupesa bize na mwana-kento samu yandi vwandaka telemina “nsambulu ya yandi.” Kutelemina “nsambulu ya yandi,” mpe kusala bafoto-mpe bima yina kele na nsoni, mpe bima ya mutindu—mutindu yina. Beno ke banza ti beno lenda baka bambongo makumi tatu ya kisengo mpe kuzwa kima na lemvo ya Nzambi, Judas? Ke sumba kima ve kasi kisika na difelo samu na beno!

¹⁴⁷ Lemvo ya Nzambi ba lendaka ve kuwisana na yawu, to ve kuvwanda . . . lendaka ve kuvwanda samu na mayele. Ya kele lemvo ya kimpwanza ya nene! “Mu ke nata kima mosi ve na maboko ya munu, kaka na kulunsi ya Nge mu ke kangama.” Kinkonga, lwalaka, mu me kwisa kaka mutindu mu kele.

Kaka mutindu mu kele, kukondwa kulomba mosi,

Kasi Menga ya Nge tiamukaka samu na munu,
Mpe ti Nge me bokila munu na kukwiza na Nge,

O Mwana-dimeme ya Nzambi, mu me kwisa!

¹⁴⁸ Kaka yina, ya kele lemvo yina nataka munu. Lemvo salaka yawu. Lemvo kele mutindu, kima yankaka yina mu ke zola kutuba, bantangu yankaka lemvo kele . . .

¹⁴⁹ Mabuundu yayi ya nene, bawu ke banza ti beno lenda kwenda kuna, ba ke banza, “Mbote, beto tungaka dibuundu ya kulutula nene na kati ya mbanza. Beto kele na kimvuka ya bamama awa yina ke sadisaka bamputu . . . bilele samu na

bamputu, mpe ke fidisa yawu na bayinsi ya nzenza. Beto ke disaka bamputu. Beto ke salaka nionso *yayi*.”

Paul tubaka, “Mu lenda sala kima mutindu mosi, mpe kima mosi ve.”

¹⁵⁰ Ba ke tuba, “Mbote, beto, beto kele organisation ya ntama. Beto me vwanda awa bamvula mafunda zole. Beto kele na bamvula bankama tanu. John Wesley, Alexander Campbell, mpe ba-fondateur yayi ya nene kuna, ba bandaka dibuundu ya beto. Alleluia!”

¹⁵¹ Mbote, Yesu Klisto tungaka Dibuundu yayi, mbotika ya Mpeve-Santu, mpe tubaka na bawu na kumata na Pantekote mpe kuingila tii bawu kuzwaka Ngolo ya Zulu.

¹⁵² Mpe dyaka beno lenda vwanda ya dibuundu ya Pantekote mpe kuzimbana. Dibuundu ya ba-Pentecotiste kele diaka ve dibuundu kulutila yankaka. Ya kieleka.

¹⁵³ Kima ya yawu kele, ya kele kaka na Dibuundu mosi, ya kele Dibuundu yina beno me butuka na mbotika ya Mpeve-Santu, “Samu ti na nzila ya Mpeve mosi beto nyonso kele ya kubotama na kati ya Nzutu mosi,” ya Ntete ya Corinthiens 12:13, ya kele kieleka, ya Ntete—ya Ntete ya Corinthiens 12. Ntangu yayi, beto me botama na kati ya Dibuundu yina.

¹⁵⁴ Kasi bantu ke banzaka ti bawu lenda samu na yawu. “Kasi, beto, mu—mu kwendaka na lukolo mpe mu longokaka na kusala *yayi*, mpe mu kwendaka na baseminere mpe mu salaka...” Yina zola kutuba kima mosi ve. Beno lenda sumba ve lemvo ya Nzambi.

¹⁵⁵ Lemvo ya Nzambi kele mutindu yayi. Bika ti mu tuba na beno disolo, na nsuka. Lemvo ya Nzambi kele mutindu yayi. Kilumbu mosi ya vwandaka ntinu mosi ya ngolo, mpe ntinu yayi ya ngolo vwandaka na mwana mpe ya vwandaka mwana mosi ya yandi. Mpe kilumbu mosi muntu ke kufwaka bantu kufwaka mwana ya bakala yina. Mpe bimonikisi tambulaka na kimfumu yayi na kusosaka muntu ke kufwaka bantu yayi. Na nsuka bawu kuzwaka muntu ke kufwaka bantu. Mpe ntangu ba kuzwaka yandi, bawu vutulaka yandi mpe tulaka yandi na boloko. Mpe ntangu bawu salaka yawu, lufundusu salamaka mpe ba zonzaka kitumbu. Oh, ya vwandaka kima mosi ya mpasi. Yandi kufwaka mwana ya ntinu, mpe yandi zabaka yina vwandaka kwiza na yandi.

¹⁵⁶ Ba tulaka yandi na kati ya ba-cellule ya kati, ba kangaka myelo, ba tulaka ba-nénuphar na zulu ya yawu na yina muntu mosi ve...mikengi pene-pene ya yawu, mpamba ve ti beto zaba yinki mutindu ya kitumbu ya mpasi mwana ya bakala yayi zolaka kuzwa, samu yandi kufwaka mwana ya ntinu, ya kimfumu, mwana ya ntinu. Mikengi kutulamaka bisika nyonso na myelo. Ba tulaka Yandi na kati ya ba-cellule ya kati. Ba katulaka Yandi bilele, na kima yankaka ve kasi dingwanda. Mpe

kuna yandi vwandaka, ya kuvwanda kuna na kondisyo yina. Na nzala, ba lendaka ve kupesa yandi madia. Yandi vwandaka na kati ya kondisyo yina.

¹⁵⁷ Na manima ba nataka yandi kuna na lufundusu. Yandi vwandaka yina zabaka dyambu mpe ba siamisaka ti yina zaba dyambu. Ba zonzaka kitumbu, ti ba zolaka kufwa yandi na yisi ya kitumbu ya nene ya lufwa, ba zolaka kufwa yandi pene-pene ya ba-centimetre makumi tanu tii kuna luzingu ya yandi ya lufwa zolaka kwenda. Ba zonzaka kitumbu na nzila ya zuzi, yandi zolaka kufwa. Mpe yandi bondilaka mpe yandi dilaka, mpe yandi tubaka, “Ata ti mu kele yina zaba dyambu, ata ti mu kele yina zaba dyambu, mu ke tala kyadi ti mu salaka yawu. Mu lendaka zola ti ata fyoti ve mu ke sala yawu. Mu ke tala kyadi ti mu salaka yawu. Na mwa ntangu fioti, na nganzi ya kudasuka ya nene, mu salaka yawu. Mu zolaka ve kusala yawu mutindu yina.”

¹⁵⁸ Kilumbu mosi ntinu kwendaka na kisika yina, samu na kutala mwana-bakala yayi, samu na kutuba na yandi, kuzonza na yandi mpe kutuba na yandi na yina me tala kufwa mwana ya yandi mosi, mwana kaka yina yandi kuzwaka. Yandi kufwaka mwana-bakala yina. Yandi tubaka, “Mu ke kwenda kuzonza na yandi.”

¹⁵⁹ Mpe ntangu yandi kulumukaka kuna, yandi talaka na manima na kati ya lupangu yina, monaka mutindu kibulu mosi na kati ya lupangu. Yandi monaka mwa nzutu ya yandi ya kukonda ya kulala kuna na nsongi, ke dila. Kizizi ya yandi nionso ya kokonda, matama ya yandi ya kukonda, meso ya yandi ya kukota na kati, ata nyonso vwandaka monana pwelele na meso ya yandi, mpe yinwa ya yandi vwandaka nyonso me kuma mpembe; ata maza ve, na mpwila. Yandi vwandaka me lala kuna na kizizi ya yandi, yandi vwandaka dila. Ntinu tubaka, “Telema.” Yandi kwisaka na yandi, mpe yandi talaka yandi. Yandi tubaka, “Samu na yinki nge kufwaka mwana ya munu? Yinki mwana ya munu ya bakala salaka na nge? Yinki yandi salaka samu na kuzwa kitumbu ya mutindu yayi mutindu nge me kufwa yandi, na kutobolaka yandi tii na lufwa na dionga mosi?”

¹⁶⁰ Yandi tubaka, “Kima mosi ve, mfumu ya munu, kima mosi ve. Kaka mutindu ya munu mosi ya kulunga ve, kaka banzila ya munu mosi. Mu kufwaka yandi samu ti mu vwandaka na musoki ya yandi, mpe mu kumaka na kudasuka mpe mu kufwaka yandi.” Yandi tubaka, “Ntangu yayi mu ke kufwa na yisi ya ludedomo ya nge, tata. Mu me bakula yawu mpe mu me fwana na kusala yawu. Kima mosi kaka mu ke na kudila, ti mu ke na kyadi ti mu me kufwa muntu ya ludedomo mutindu yayi, kukondwa diambu mosi.”

¹⁶¹ Ntinu balulaka binkoso ya yandi mpe kwendaka, basikaka na bureau, mpe tubaka, “Beno bebisa bimbangi nionso!” Beno

zaba, beno tula yawu na mubu ya kuzimbana. “Beni bebisa bimbangi nionso! Beni sukula yandi, beno sukula yandi. Mu ke fidisa robe samu na yandi.”

¹⁶² Na manima ya mwa ntangu fioti, limousine mosi ya kulutila nene kwisaka kuna na kielo. Ntangu yawu salamaka kuna, ba tandaka tapis mosi tii na kivinga ya boloko. Ntinu telemaka na nsuka ya limousine, yandi tubaka, “Kwisa, mwana ya munu ya bakala, mpe tambula na munu na yinzo ya ntinu,” yandi tulaka mvwela ya ntinu pene-pene ya dipeka ya yandi. Yandi tubaka, “Kubanda ntangu yayi nge kele mwana ya munu.”

¹⁶³ Samu ti yandi vwandaka na mawa, ya kele lemvo. Ya vwandaka munu, ya vwandaka beno. Beto kufwaka Mwana ya Nzambi, na masumu ya beto. Beto vwandaka banzenza, ya mvindu, ya nzanzi, ya kulala na kati ya ba-cellule ya yinza. Nzambi sukulaka beto na nzila ya Menga ya Mwana ya Yandi Mosi, mpe sukulaka beto, lwataka mvwela ya Mpeve-Santu. Mpe ntangu yayi pusu-pusu ya nene ya Nzambi ke vutuka na kielo kilumbu mosi, mpe beto ke vutuka na yinzo samu na kuzinga na Yandi. Ba me bebisa bimbangi nionso, ba lenda fundisa beto diaka ve; ba me yoka yawu, Yandi tulaka yawu na mubu ya mulemvo mpe ke bambuka moyo na yawu diaka ve. Kuyituka ve ti beto lenda yimbila:

Lemvo ya ngitukulu! Wapi mutindu mbote ya
ke wakana,
Yina vuukisaka muntu ya mawa mutindu
munu!
Mu vwandaka mbala mosi ya kuzimbana, kasi
ntangu yayi ba me mona munu,
Mpe vwandaka mpofo, kasi ntangu yayi mu me
mona.

Ya vwandaka lemvo yina longaka ntima ya
munu na kubanga,
Lemvo boma ya munu me lembama;
Mutindu ntalu lemvo yango me monana
Ngunga mu kwikilaka ntete!

¹⁶⁴ Beni ke bika ve yayi kuvwanda ngunga ya beno malu-malu yayi, nkundi ya nsumuki, na yina beto ke kulumusa bayintu ya beto na mwa ntangu fioti samu na kisambu? Bika ti yayi kuvwanda ngunga yina beno kwikilaka ntete, na ntangu yayi. Beni telemisa mabanza ya beno na zulu, mpe beno tuba, “Mfumu Nzambi, mu me kubwa. Mu me bakula ti ya ke lombela lemvo samu na kuvulusa munu. Mu lenda vulusa munu mosi ve. Mu me zimbana. Mu me zimbana. Mu lenda sala kima mosi ve. Mu—mu—mu kele ya muvimba ya kukondwa lusalusu, ya kukondwa kivuvu, kukondwa Nzambi, kukondwa mawa, kukondwa Klisto, na yinza, na kimbevo ya yintu. Nge ke vwanda ve na kyadi mpe katula munu na cellule yayi ya disumu yina mu kele bubu yayi, O

Mfumu? Mpe lemvokila munu, musumuki.” Beno zola kutelemisa diboko ya beno, kutuba, “Mfumu Nzambi, mu kele muntu yina kele na nsatu ya lemvo ya Nge”? Beno zola kutelemisa diboko ya beno, kutuba, “Sambila samu na munu, Mpangi Branham, mu ke kwikila ntangu yayi”? Nzambi sakumuna nge kuna, mpangi ya munu ya bakala.

¹⁶⁵ Muntu yankaka ke tuba, “Mpangi Branham, bambuka moyo na munu ntangu yayi, oh, mpangi-bakala, pardo sala yawu, na kisambu.” Nzambi sakumuna nge, mama. “Sambila ti...” Nzambi sakumuna nge, mpangi-bakala. Nzambi sakumuna nge, mpangi-kento. Nzambi sakumuna nge, mpangi-bakala, awa na nela. Nzambi sakumuna nge, mpangi-bakala, kuna na manima. Nzambi sakumuna nge, mpangi-bakala, awa, yankaka yina. “Bambuka moyo na munu, Mpangi Branham.” Nzambi sakumuna mpangi ya munu ya bakala kuna. Yinga, yina yankaka awa. Nzambi sakumuna nge, mpangi-kento. Nzambi sakumuna nge awa, mpangi-bakala. Yandi ke mona beno ntangu yayi. Ya kieleka ya zola kutuba yawu. Nzambi sakumuna nge, ntwenya ya bakala. Yandi ke mona, zaba. Nzambi sakumuna nge, mpangi-bakala. Nzambi sakumuna nge, mpangi-kento na kibaka. Nzambi sakumuna nge awa, mpangi-bakala. Nzambi sakumuna nge, mpangi-bakala na manima ya kibaka.

Kaka mutindu mu kele, kukondwa...

Ya ke vwanda na yankaka? Nzambi sakumuna nge. Mu ke mona diboko ya nge na manima kuna.

Kasi Menga ya Nge tiamukaka samu na munu,
Yinga, Mfumu. Nzambi sakumuna nge, mpangi-kento.

Mpe ti... (Nzambi sakumuna nge, mpangi ya kento)... Nge me pesa munu muswa ya kukwiza... (Nzambi sakumuna nge, kuna na manima...?...). Nge,

Beno sambila, beno sambila, Baklisto.

Mu... (Nzambi sakumuna nge, ntwenya ya mama)... Mu me kwiza!

Kaka mutindu mu kele, mpe ke vingila ve
Samu na kukatula tasi ya ndombe na moyo ya munu,

Na Nge, Yina Menga lendaka sukula konso ditona,

O Mwana-dimeme ya... (Lemvo, oh, lemvo!)
Mu me kwiza! Mu me kwiza!

¹⁶⁶ Ntangu yayi, ya me vwanda pene-pene ya kumi na tanu to makumi zole na tanu. Ntangu yayi na bayintu ya beno ya kukulumusa, mu ke yufula beno yina me telemisa maboko ya beno, na pima nionso ntangu yayi beno telema kaka na ntangu mu ke sambila samu na beno. Beto kele ve na kisika awa na autel.

Ya kele kaka, mu lenda ve. Beno telama, muntu nyonso yina me telemisa diboko ya bawu, zola ti ba sambila bawu ntangu yayi. Beno telama kaka ntangu yayi na yina mu ke sambila. Beno telama kaka, bisika nyonso.

...mwangisaka samu na munu,
Mpe yina...(Ya kele mbote, Nzambi
sakumuna nge...?...)

...pesa munu muswa ya kukwiza na Nge,
O Mwana-dimeme ya Nzambi, mu me kwisa!

¹⁶⁷ Beno bambuka moyo, ya lendaka vwanda na kilumbu mosi ntangu lemvo ke vwanda diaka ve, ya ke fuluka diaka ve samu na beno, ntangu ke luta mingi. Ntangu yayi ntangu me luta mingi ve.

¹⁶⁸ O Nzambi, Tata ya Mfumu ya beto Yesu Klisto, Yina vumbulaka Mvulusi ya beto na lufwa, ntangu yayi ke zinga, Yandi Yina kele nene mingi na Nkembo, ke fidisa Mpeve-Santu ya Klisto na zulu ya beto, samu na kunata kundima na nsumuki. Nzambi, mu ke sambila samu na bantu yayi me telema. Ya kele kieleka, Mfumu. Nge tubaka, "Yandi yina ke pesa kimbangi ya Munu na ntwala ya bantu, yandi Mu ke pesa kimbangi na ntwala ya Tata ya Munu mpe Bawanzio ya santu." Beto zaba, ntangu beto ke telama na suka yina ya nene ya lusambusu, wapi ntangu ya ke vwanda. Ba me telama ntangu yayi, Mfumu, na yina masumu ya bawu ke kwenda na ntwala ya bawu; masumu ya bantu yankaka ke landa. Bantu yayi me telema awa na suka yayi samu ba me funguna masumu ya bawu, na kuzabaka ti bawu me sala yimbi mpe mpe bawu zola Nge mutindu Mvulusi ya bawu. Nge ke swasikisaka misisa ya bantima, mpe Nge zaba nionso samu na bawu.

¹⁶⁹ Mu ke sambila, Tata, ti Nge ke pesa mvutu na balombilu ya bawu. Vulusa bawu. Bawu kele ba-trophée ya Nsangu ya fyoti na suka yayi, ya lemvo ya Nzambi; ata yina beto salaka, ke kulumuka kaka mpe ke baka beto. Pesa yawu, Mfumu. Pesa lemvo na bantima yayi. Bika ti bawu mona ntangu nionso Yesu mutindu Mvulusi ya bawu. Bawu me sala kisalu. Mpeve-Santu tubaka na bawu na kutelama, mpe bawu salaka yawu. Mpeve-Santu tubaka na bawu na kutelama. Mpe bawu, na kati ya kutumama na Mpeve, telamaka.

¹⁷⁰ Ntangu yayi, Mfumu, Nge zitisa Ndinga ya Nge. Nge tubaka, "Muntu ve lenda kwiza na Munu kana ti Tata ya Munu kubenda yandi ntete. Mpe bayina nionso Tata pesaka Munu, ke kwisa na Munu. Yandi yina ke kwisa na Munu, Mu ke tula yandi na ngaanda ve. Yandi yina ke kuwa Bandinga ya Munu mpe ke kwikila na Yandi yina fidisaka Munu, kele na Luzingu ya kukonda nsuka, mpe ke kwiza ata mbala mosi ve na lufundusu kasi me luta lufwa na Luzingu." Na yawu, Mfumu, na zulu ya lufulu ya Masonuku yayi, ya kele Bandinga ya Nge Mosi,

Mfumu, yina beto ke tanga na Santu Jean 5:24, “Yandi yina ke kuwa Bandinga ya Munu mpe ke kwikila na Yandi yina fidisaka Munu, kele!” Samu na yinki? Samu yandi me kwikila, lemvo kwisaka kutala yandi. “Me kwiza na Luzingu ya kukonda nsuka, mpe ke kwiza ve na lufundusu (yandi ke kwenda na ntwala ya lufundusu), mpe me kwiza ve na lufundusu kasi me luta lufwa na Luzingu.” O Nzambi, wapi mutindu beto ke tonda Nge samu na yayi!

¹⁷¹ Beto ke sambila ntangu yayi ti Nge ke bumba bawu na kati ya luzingu. Bika ti bawu, bawu nionso, kuzwa mbotika, ba bokila bawu na Nkumbu ya Mfumu, kusukula masumu ya bawu. Pesa yawu, Mfumu.

¹⁷² Ntangu yayi mu ke talisa bawu na Nge, mutindu kisadi ya Nge, na kukwikilaka ti Wanzio ya nene ya Nzambi Yina monikaka kuna. Mpe, Tata, Nge zaba disolo yina nionso, mpe Wanzio yina ya nene monikaka kuna na Kilumbu ya tanu na suka, kaka na kubasika ya mwini ya lubungi, mpe tubaka Bandinga yayi, na mutindu ya mikyama tatu basikaka na zulu ya mongo. Mfumu Nzambi, bika ti Nzambi Yina monikaka na munu kuna na mukyama, bika ti Yandi vulusa bantu yayi, na lemvo ya Yandi, kaka ntangu yayi. Mu ke pesa bawu na Nge, na kuvingilaka na Nge na kubumbaka Ndinga ya Nge, mpe Nge zola, mpe mu ke kutana na bawu na kilumbu yina ya nene, kukondwa ditona to mifutu na kati ya moyo ya bawu. Pesa yawu. Na Nkumbu ya Yesu, mu ke pesa bawu na Nge. Amen.

¹⁷³ Nzambi sakumuna nge. Ntangu yayi mutindu beno yina kele ya kuvwanda, muntu nyonso yina kele ya kuvwanda pene-pene ya bantu yina kele Muklisto, beno pesa bawu mbote. Beno tuba na bawu, beno bokila bawu na dibuundu, mpe nyonso yankaka, ti bawu lenda vwanda . . . Oh, Yandi kele ve mbote?

Lemvo ya ngitukulu! Wapi mutindu mbote ya ke wakana,

Yina vuukisaka muntu ya mawa mutindu munu!

Mu vwandaka mbala mosi ya kuzimbana, kasi ntangu yayi ba me mona munu,

Mu vwandaka mpofu, kasi ntangu yayi mu me mona.

Ya kele lemvo longaka na ntima ya munu na kubanga,

Mpe lemvo boma ya munu me lembama;

Mutindu ntalu lemvo yango me monana

Ngunga mu kwikilaka ntete!

Nge me kwikila? Kana nge me kwikila, telemisa diboko ya nge.

Oh, mutindu mu zola Yesu,

Oh, mutindu mu zola Yesu,

Oh, mutindu mu zola Yesu,
Samu Yandi zolaka munu ntete.

Ntangu beto vwandaka kuna bamvula
mafunda kumi,
Kulezima mutindu mwini;
Beto kele ve na bilumbu ya kuyimba lukumu
ya Nzambi (Matondo na Nzambi!)
Kulutila ntangu beto bandaka ntete.

¹⁷⁴ Beno zola Yandi? Ntangu yayi, Yandi kele ve mbote? Ntangu yayi:

Ntangu . . .

Na ntangu yina beto ke yimba dyaka yawu, mu zola beno kupesa mbote na muntu mosi na nzila ya beno, kieleka na kubikana swi beno tuba, “Nzambi sakumuna nge, kizieti.” Na lembami nionso mpe santu ntangu yayi.

Ntangu beto ke . . . (. . . ? . . .)
. . . Lukumu ya Nzambi
Kulutila ntangu beto bandaka ntete.

Na kulunsi, na kulunsi kisika mu monaka ntete
Nsemo,
Mpe kizitu ya ntima ya munu balukaka,
Ya vwandaka kuna na lukwikilu mu kuzwaka
kumona ya munu,
Mpe ntangu yayi mu kele na kyese kilumbu
nyonso!

Oh, na kulunsi, na kulunsi kisika mu monaka
ntete Nsemo,
Mpe kizitu ya ntima ya munu balukaka,
Ya vwandaka kuna na lukwikilu mu kuzwaka
kumona ya munu,
Mpe ntangu yayi mu kele na kyese kilumbu
nyonso!

Beno kele ve na kyese?

Mu kele na kyese ti Yesu me tula munu na
kimpwanza,
Mu ke na kiese ti Yesu tulaka munu na
kimpwanza,
Oh, mu kele na kyese ti Yesu tulaka munu na
kimpwanza,
Kuyimbaka, nkembo, Alleluia, Yesu tulaka
munu na kimpwanza.

Oh, mu kele na kyese ti Yesu tulaka munu na
kimpwanza,
Oh, mu kele na kyese ti Yesu tulaka munu na
kimpwanza,

Oh, mu kele na kyese ti Yesu tulaka munu na kimpwanza,
 Kuyimbaka, nkembo, alleluia, Yesu tulaka munu na kimpwanza.

¹⁷⁵ Beno zola Yandi ve? Yandi kele ve mbote? Oh, mu banza kaka ti Yandi kele mbote. Ntangu yayi, beno banza kaka, ti Biblia yayi kele Kieleka ya Yandi, mpe Biblia yayi ke longa ti Yandi kele mutindu mosi mazono, bubu yayi, mpe kukonda nsuka. Mu zola kuyufula beno kima mosi. Kana Yandi kele mutindu mosi mazono, bubu yayi, mpe kukonda nsuka . . . Nzambi lemvokila munu samu na kutuba mpova ya kuvweza, “kana,” kasi Yandi kele mutindu mosi. Kasi kana Yandi kele mutindu mosi, mu ke tula yawu mutindu yina, na yina wapi mutindu ya Muntu Yandi ke vwanda? Yandi ke vwanda mutindu mosi Yandi vwandaka.

¹⁷⁶ Ntangu yayi, ya kele kaka na kima mosi ya kuswaswana na Yandi yina kele awa na suka yayi kulutula yina Yandi vwandaka na kati-kati ya bantu na Galilée, yina zolaka vwanda nzutu ya Yandi Mosi ya nsuni, nzutu ya Yandi ya nsuni; samu ba me telemisa yawu (beno ke kwikila yawu?), kele ya kuvwanda na diboko ya kibakala ya Bunene na Zulu, ke zinga ntangu nyonso samu na kusambila samu na funguna ya beto. Beno bambuka moyo, Yandi lenda sala kima mosi ve samu na beto tii ntete beto ke ndima Yandi mpe ke kwikila ti Yandi ke na yawu, mpe ke tuba ti Yandi ke na yawu, samu ti Yandi kele Nganga-Nzambi ya Ntete yina lendaka . . . Yandi kele Nganga-Nzambi ya Ntete yina ke na kusambilaka na zulu ya funguna ya beto.

¹⁷⁷ Ntangu yayi mingi ya beno mitangi ya Biblia ke tuba ti Ya ke tuba “kuzonza.” Mpe *kuzonza* mpe *kufunguna* ti ya kele mpova mosi. Beno me mona? “Salaka Nganga-Nzambi ya Ntete,” na Buku ya ba-Hebreux, kapu 3, “ntangu yayi ke na kulombila beto na zulu ya funguna ya beto.” Na yina Yandi lenda sala kima mosi ve tii ntete beto ke ndima ti Yandi salaka yawu. Beno me mona, beno fukama awa na autel mpe beno sambila mpimpa ya muvimba, beno ke sala ata mbote ve tii kuna beno ke kwikila ti Yandi ke lemvokila beno, na yina beno ke telama. Kuna, ya kulutula beno ke kuzwa lukwikilu ya kele wapi kisika beno . . . Beno zingaka mbala mosi *awa* na poto-poto ya disumu. Ntangu yayi, beno bantwenia ya bandimi, ntangu yayi beno ke kwikila ti beno me vuluka, mutindu yina ve? Na yina beno me telema *awa*, beno me telema fioti mingi. Yinki ya zola kutuba? Lukwikilu ya beno, samu beno ke kwikila ti beno kele Muklisto ntangu yayi, beno ke zinga na zulu ya kima yina ntangu yayi. Beno me mona? Ntangu yayi kana beno zola kutelama fyoti mingi, beno vwanda kaka na lukwikilu mingi, samu ti ya kele ve na ndilulu, beno landila kaka.

¹⁷⁸ Mbote, oh, ya lenda salama ve kieleka. Bima nyonso lenda salama na bayina ke kwikila. Ya kele kieleka. “Kana beno tuba na mongo yayi, ‘katuka awa,’ mpe beno tula ntembe ve na kati ya

ntima ya beno, kasi beno kwikila ti yina beno ke tuba ke salama, beno lenda kuzwa yina beno ke tuba.”

Ntangu yayi Yesu Klisto ke zinga na kati ya bantu.

¹⁷⁹ Kilumbu mosi Klisto vwandaka na kati ya Dikunzi ya Tiya, Yina beno ke mona bakaka, beto ke kwikila ti Yawu kele Yehowa Nzambi. Ya kele yina Wanzio vwandaka meka na kukuma na beto. Ntangu yayi, Yandi vwandaka na Butata kuna, Yandi vwandaka Tata ya Israel, yinsi mosi.

¹⁸⁰ Na yina Yandi kwizaka mpe zingaka na kati-kati ya bantu ya Yandi, mutindu Klisto, Mwana. Ya kele kieleka? Klisto vwandaka Mwana ya Nzambi.

¹⁸¹ Ntangu yayi Yandi kele Klisto, Mpeve-Santu, yina kele Kupakulama. Klisto zola kutuba “mupakulami,” mpe Yina ba me pakula na zulu ya bantu, Klisto na beto, Mpeve-Santu. Ya kele Klisto na beto, na kati ya beto. Beno ke kwikila yawu? Beno vwanza kieleka na buzitu kaka mwa ntangu fyoti, kaka swi. Ntangu yayi Yandi kele mutindu mosi?

¹⁸² Mu ke kwikila na mwa ntangu fioti me luta mu kuzwaka lubokilu mosi, na kutubaka ti bantu vwandaka tambula na bakiti mpe nionso kuna. Beto ke zonzila yawu na ntwala na lukutakanu mosi ya dibuundu. Mu tubaka na Billy kuna, kana ba zolaka sambila samu na bambevo, kana kuna vwandaka na bantu mingi kuna, samu na kukabula bawu bakalati ya bisambu. Yandi tubaka ti yandi lenda sala yawu. Mu fwana banza ti yandi salaka yawu.

¹⁸³ Kubanda bangonda zole to tatu me luta, kubanda ntangu mosi ya kima mosi salamaka, ministele me kuma na kisika mosi tii kuna ya me katuka na diboko ya munu. Bawu ke mona kuswasikisa mabanza yina mpe nionso yina, wapi mutindu ya ke tuba mpe ke tuba na bantu, kaka kieleka mutindu Mfumu ya beto kusalaka ntangu Yandi vwandaka awa na zulu ya ntoto. Beno nionso me monaka yawu, mu banza. Bantu yikwa awa me monaka yawu ata fioti ve to me monaka yawu ata fioti ve kusala? Beto tala maboko ya beno, me monaka yawu ata fioti ve. Oh! Beno me monaka yawu ata fioti ve kusala. Mbote, ya kele na nkonga na kati awa yina me monaka yawu ata fioti ve, mu banza banzenza. Beto zaba ve kisika bantu me katuka.

¹⁸⁴ Yayi kele tabernacle yina ke yambaka bantu nionso. Beto ke teleminaka ve ba-denomination, kasi beto kele—beto kele ve samu na bawu to. Beto ke bika kaka bawu kukwenda nzila ya bawu. Beto ke kwikilaka na kubaka bantu. . . Kana bawu zola kuvutuka na denomination, mbote mingi, ntangu nyonso yina bawu ke zinga luzingu ya Muklisto. Beto ke kaka—kaka kisika ya mpulusu awa. Yawu yina ministere ya munu kele samu na bawu.

¹⁸⁵ Ntangu yayi, kasi mu ke kwikila ti Biblia ke longa, na Hébreux 13:8, ti Yesu Klisto kele mutindu mosi mazono, bubu yayi, mpe kukonda nsuka. Beno ke kwikila yawu? Mbote, kana

Yandi kele mutindu mosi. . . Ntangu yayi na ntangu yina beno nionso bikana swi na mwa ntangu fioti, Mu zola kuzonza na beno kaka na ngaanda ya ntima ya munu, mpe kuna beto ke kuzwa lukutakanu ya kubeluka ya nzutu. Mu zola kuyufula beno kima mosi. Kana Yandi kele mutindu mosi mazono, bubu yayi, mpe kukonda nsuka, na yina wapi mutindu Yandi. . . Mutindu kaka beto lendaka tuba kuna, kana Yandi kele Mpeve, Yandi ke sala mutindu mosi Yandi salaka mazono. Ya kele kieleka? Yandi ke sala mutindu mosi Yandi salaka mazono. Wapi mutindu Yandi salaka mazono?

¹⁸⁶ Yandi vwandaka ya kuswaswana na muntu nyonso yankaka? Yandi kele kaka muntu, yina vwandaka talana mutindu muntu. Yandi vwandaka muntu. Yandi butukaka, Yandi vwandaka muntu. Yandi vwandaka na nsuni mpe Menga. Yandi talaka mpasi, Yandi niongaka, Yandi lutaka na bampukumunu. Yandi vwandaka muntu. Ya kele kieleka, mutindu yina ve?

¹⁸⁷ Kasi yinki salaka Yandi Nzambi? Ya kele samu ti Mpeve ya Nzambi vwandaka na zulu ya Yandi. Yandi vwandaka Mesiya yina ba pakulaka. Mpe wapi mutindu bawu zabaka ti Yandi vwandaka? Moise tubaka, “Mfumu Nzambi ya beno ke basisila beno profete mutindu munu. Mpe ya ke salama ti nani ke kuwa ve ba ke katula Profete yayi na kati-kati ya bantu.” Ntangu yayi, Yandi vwandaka profete. Na yina Israel vwandaka sosa profete? Bawu zolaka, kana bawu vwandaka sosa Mesiya. Mpe Mesiya zolaka vwanza profete.

¹⁸⁸ Ntangu yayi bika ti beto kota na kati ya yawu na sekonde mosi, kaka na mwa basekonde fioti, mpe beno kuwa na bukebi. Ntangu yayi, beno bumba mabanza ya beno na Nzambi, samu ti beto zaba ve yina Nzambi lendaka sala, beno zaba ve yina Yandi ke tuba na munu na kusala.

¹⁸⁹ Mu zaba ti beto kele na dikabu ya profesu na kati ya dibuundu. Mpangi ya beto Neville, yandi ke pesaka profesu samu na bantu, yina kele nene. Beto ke sepela na yawu. Beto me talisa na yawu nionso. Beto kele na bayankaka awa yina ke zonzaka na bandinga. Beto ke kwikilaka ve ti bantu fwana zonga na bandinga na kuzwa Mpeve-Santu. Ya kele ve na Masonuku ya mutindu yina. Kasi beto ke kwikila ti ya kele na dikabu ya Mpeve-Santu yina ke zonzaka na bandinga, beto kele na yawu na dibuundu ya beto. Kasi beto ke sala bawu. . . Beto ke kwenda ve na ntuala. Beto ke kwikila ti Yawu kele Ndinga ya Nzambi. Beto ke zonga ntangu Mpeve-Santu ke zonga, mpe beto ke bika kaka yawu kukwiza bambala tatu. Mpe ya fwana. . . ya lenda vwanza ve na yina mu ke longa to na nzila, samu ti mpeve ya baprofete ke tumamaka na profete. Benome mona? Ya fwana natama na Biblia mbote. Muntu mosi ve lenda tuba ti ya kele ve na kima mutindu dikabu ya Mpeve-Santu mpe kuzonza na bandinga. Beto zaba yawu. Biblia ke longaka yawu, mpe beto ke kwikilaka na yawu. Mpe matondo na Nzambi beto kele na

yawu na dibuundu ya beto awa! Beto kele na makabu ya profesesi, ba fwana meka yawu ntete mpe kumona kana bawu kele ya kusungama to ve, mpe kuna dikabu ya profesesi.

¹⁹⁰ Na yina ya kele na profete. Ntangu yayi, yina, ntangu yayi beno ke kota na kisalu.

¹⁹¹ Makabu ya bawu, ya kele, kuzonza na bandinga, mpe luntendulu ya bandinga, mpe luzabu, mpe ndwenga, mpe kuswasikisa mabanza, mpe nionso yina. Nionso yina kele makabu.

¹⁹² Kasi na yina ya kele na bisalu tanu. Ya ntete kele bantumwa, baprofete, milongisi, ba-evangeliste, mpe ba-pasteur. Yina kele bisalu ya kutumama ya Nzambi. Bantu ke simbaka bawu, beno me mona. Ba kele ve, ba lenda ve. . . Beno lenda zola ve ti bawu, beno lenda sambila ve samu na bawu; ba me pesa bawu na bunene nionso, beno me butuka.

¹⁹³ Profete kele profete ve kana muntu mosi me tentika maboko na zulu ya yandi mpe me sala yandi profete. Profete me butuka na kivumu ya mama ya yandi, yandi kele profete, beno me mona, na yina yandi kele ntangu nyonso profete. Beno me mona?

¹⁹⁴ Nzambi tubaka na Jérémie, yandi tubaka, “Ntete nge salama na kivumu ya mama ya nge,” yandi tubaka, “Mu zabaka nge mpe santisaka nge mpe tumaka nge profete na bayinsi.” Ya kele kieleka. Beno me mona? Moise, na ntwala yandi butuka, yandi vwandaka mwana ya kuvedila. Yandi vwandaka profete ya Mfumu. Bayankaka nionso basikaka. Klisto vwandaka Mwana ya Nzambi, na disamba ya Eden. Ya kele kieleka. Beno me mona, makabu mpe balubokilu ba ke sobaka yawu ve.

¹⁹⁵ Kasi makabu me pesama na Nzutu. Ntangu yayi beto me zaba yawu, beto me zaba makabu nyonso yayi.

¹⁹⁶ Ntangu yayi beto mona yina Yesu vwandaka na kati-kati ya beto, kumona yina Yandi vwandaka na manima kuna. Beto ke mona ti ntangu Yandi bandaka ntete ministele ya Yandi. . . Ntangu yayi, beno kuwa mbote, nzenza. Ntangu Yandi bandaka ntete ministele ya Yandi, na Santu Jean, kapu ya lte, beto talaka na manima ba botikaka Yandi, na manima Yandi kwizaka. . . Yandi butukaka mpe kumaka bamvula makumi tatu, Yandi bakaka mbotika na nzila ya Jean. Mpeve-Santu kulumukaka mutindu yembe mpe kulumukaka na zulu ya Yandi, mpe Ndinga mosi kwisaka mpe tubaka, “Yayi kele Mwana ya Munu ya luzolo na kati ya Yandi. . .” Buku ya kieleka ya ba-Grec ya kieleka tubaka, “Na Yandi Mu me sepela na kuzinga.” Yandi tubaka, “Na Yandi Mu me sepela, na Yandi—na Yandi Mu me sepela na kuzinga.” Kasi, beno me mona, yina ke wakana fioti ya kuvutuka na manima na beto, mpe verbe na ntwala ya adverb, kasi ya kieleka ya kele, “Yina mu me sepela na kuzinga.” Samu ti, Klisto, Nzambi vwandaka na kati ya Klisto, na kuvutulaka yinza na ngwisani na Yandi mosi. Beto zaba yawu.

¹⁹⁷ Ntangu yayi, na mbala mosi Yandi kwendaka bilumbu makumi yiya na ntoto ya kuyuma, ya kumekama na dyabulu. Na yina Yandi kwisaka na ministere ya Yandi, bandaka na kusambila samu na bambevo.

¹⁹⁸ Mpe na manima ya mwa ntangu fioti, bakala mosi kwisaka na nkumbu ya Simon Pierre, kiboba mosi ya mulobi, yina me longukaka ve, lendaka ve kusonika nkumbu ya yandi mosi. André tubaka na yandi samu na Muntu yayi yandi kwikilaka ti yandi kele Mesiya. “Buzoba!”

¹⁹⁹ Yandi kwisaka na Yandi. Mpe kaka na ntangu yandi belamaka na Mvwandulu ya Yesu, Yesu tubaka, “Nkumbu ya nge kele Simon, mpe nge kele mwana ya Jonas.” Yandi zabaka ti kima mosi salamaka. Yandi zabaka ti yina vwandaka Mwana ya Nzambi. Mpe ya sepelisaka Yandi na kupesa yandi bafungula ya Kimfumu, salaka yandi yintu ya dibuundu.

²⁰⁰ Ya vwandaka na muntu mosi ya kutelama kuna, na nkumbu ya Philippe. Philippe monaka yawu, mpe yandi banzaka, “Mbote mingi! Mu zaba muntu yina kele muntu ya mayela ya Biblia, ke zingaka pene ya bakilometele kumi na tanu pene-pene ya mongo. Mu ke kwenda mbangu kuna mpe ke tuba na yandi. Nkumbu ya yandi kele Nathanael.”

²⁰¹ Yandi kwendaka mbangu kuna na nswalu kilumbu yina. Na suka yina landaka yandi kumaka kuna, mu banza na kubasika ya kilumbu. Yandi kimaka mbangu mpe konkotaka na kielo. Mpe Mama Nathanael tubaka, “Mbote, yandi kele kuna na kilanga ya bayinti ya bambuma, Philippe.” Nkundi ya yandi, yandi kwendaka kuna, mpe yandi vwandaka ya kufukama, vwandaka sambila. Kaka na ntangu yandi telamaka, Philippe tubaka, “Kwisa, tala Nani mu me mona! Yesu ya Nazareth, mwana ya Joseph.”

²⁰² Ntangu yayi musambidi yayi, ya lukumu tubaka, “Ya lendaka vwanda na kima ya mbote yina ke basika na Nazareth?” Yandi pesaka yandi nsamunu ya mbote, kima ya mbote, yandi tubaka, “Kuvwanda ve na yinzo mpe kusawula yawu, kukwenda ve kuzonzila yawu. Beno kwisa kaka, beno mona samu na beno mosi. Beno kwisa, beno me mona! Beno kwisa kaka, beno tala kana kima mosi ya mbote lendaka basika na Nazareth.”

²⁰³ “Nge zola kutuba Mesiya? Samu na yinki, Mesiya ke kwisa, Yandi ke kulumuka, mpe ke kulumuka na... Ba-couloir ya Mazulu ke kulumuka, Yandi ke kwisa mbala mosi na yinzo ya ntinu. Yandi ke kwisa na organisation ya beto ya nene.” Bawu ke banza kaka yawu, beno me mona, ya fwana kwiza na organisation ya bawu. “Yandi ke kwisa mbala mosi na organisation ya beto, ke kulumuka kuna na zulu ya miludi ya yinzo ya ntinu kuna. Mpe Yandi ke basika na mantwala na ngaanda mpe ke kwiza mbala mosi na kiti ya kimfumu, mpe tii na kisika ya kulutula Santu ya santu, mpe kutuba, ‘Mu kele

Mesiya.” Mesiya ke kwisaka ata fioti ve mutindu yina. Mesiya ke kwisaka kisika Yandi zola. Yandi kele ya nene, Yandi ke salaka mutindu Yandi ke salaka.

Yandi tubaka, “Mbote,” yandi tubaka, “kwisa mpe tala! Kwisa, tala nge mosi.”

²⁰⁴ Beno telama ve pene-pene mpe kutuba, “Mu ke kwikilaka ve na kima yina ya exalté.” Beno kwisa kaka, beno tala kana ya kele na kima mosi samu na Yawu.

²⁰⁵ Na yawu yandi, na nzila, mu lenda kuwa bawu kuzonza. Beto, beno zola kuwa yina bawu vwandaka zonzila? Beto kuwa mpe beto mona yina bawu tubaka. Mu banza, na kukwendaka na lweka ya nzila, beno zaba, Philippe tubaka, “Nge zaba, Nathanaël, mu zaba ti nge kele mulongoki ya Biblia, na yawu mu zola kuyufula nge kima mosi. Beto ke vingila Mesiya, mutindu yina ve?”

²⁰⁶ “Oh, yinga, beto ke na kukota na bilumbu ya nsuka samu na nsungi yayi mpe yayi, Mu ke kwikila ti nsungi ke mona Mesiya.” Ntangu yayi beno kuwa. “Oh, kasi beto bawu yayi, beto kele mpe ve yinsi mosi, beto nionso kele ya kumwangana na kati-kati ya bantu. Yinki mutindu beto lenda? Nionso yayi!” Nzambi ke kwizaka na ngunga yina beno ke banza ve. Ya kele ntangu Yandi kele kuna.

²⁰⁷ Yandi tubaka, “Kasi, vingila fioti, wapi mutindu ya muntu Mesiya yayi ke vwanda?”

“Oh, Moise, mulongisi ya beto, tubaka na beto ti Yandi ke vwanda profete.”

²⁰⁸ “Mu ke tuba na nge samu na Yesu yayi ya Nazareth. Nge ke bambuka moyo na mulobi-mbisi ya kiboba yina zabaka kima ve ti nge sumbaka mbisi na ntangu yina, yina nge nataka, nge nataka na yandi, mpe yandi lendaka ve kusinié réçu, yandi vwandaka me longukaka ve?”

²⁰⁹ “Yinga! Oh, oh, yinga, uh-huh. Jonas mpe mwana-bakala ya Jonas. Yinga, mu sumbaka na Jonas, mpe.”

²¹⁰ “Mbote, ntangu yayi, nge zaba yinki? Pierre kwisaka kuna. . .” To Simon, mu zola tuba, nkumbu ya yandi vwandaka Simon na ntangu yina. Yandi tubaka, “Simon kwisaka kuna na lukutakanu ya Yandi. Mpe ntama mingi ve yandi kwendaka, yandi. . . Beno ke bambuka moyo mutindu Simon vwanda tubaka na beto ti tata ya yandi tubaka na yandi ti ‘Beno vwanda ya kuvunama ve, samu ti ya ke vwanda na baprofete mingi ya luvunu na ntwala ya Mesiya ya kieleka.’ Mpe ya kele kieleka. ‘Bansangu mingi ya luvunu ke basika.’ Kasi yandi tubaka, ‘Beno ke zaba ntangu Nsangu ya kieleka ke kwisa, samu, beno bambuka moyo, beto ba-Juif ke kwikilaka ti Mesiya yayi ke vwanda profete.’ Beto ke kwikilaka baprofete ya beto.”

211 Beno yufula Juif mosi ntangu yayi. Israel, ntangu ba ke baka Biblia yina kaka kuna ntangu yayi, yina katukaka na Iran mpe nionso yina, ba ke tangaka Yawu. Bawu ke tuba, “Kana ti Yesu vwandaka Mesiya, beto mona Yandi kusala kidimbu ya profete, beto ke kwikila Yandi.” Yinga, tata. Bawu zaba ti baprofete yayi kele kieleka.

212 Na yawu Nathanael zolaka tuba, “Oh, mu ke kwikila ti Mesiya ke vwanda profete, mpamba ve ti Moise tubaka, ‘Mfumu Nzambi ya beto ke telemisa profete.’”

213 “Mbote, ntangu yandi monaka yawu, ti Simon yina nge ke na kuzonzila, Yandi tubaka, ‘Nkumbu ya nge kele Simon, mpe nge kele mwana ya Jonas.’ Yandi zabaka yandi kaka ve, kasi Yandi zabaka papa ya yandi yina ya kiboba ya santu ya Pharisien.”

“Ah! Mu lenda kwikila yawu ve. Beno me kota na mudindu.”

214 Yandi tubaka, “Oh, ve, mu lendaka ve! Kwise, tala. Kwise, mona! Kwise!” Ba kotaka na nzila, bawu kwendaka.

215 Na nsuka ya nyonso yandi kwendaka pene-pene na Mvwandulu kisika wapi Yesu vwandaka, mu banza ya kutelama na kati ya nkonga ya nene ya bantu kisika mosi kuna. Yesu vwandaka ya kutelama kuna, vwandaka tala bisika nyonso. Na manima ya mwa ntangu fioti Yandi talaka kuna, mpe Yandi monaka Nathanael me telema kuna, Yandi tubaka, “Beno tala Israélite, na yina luvunu kele ve!” Yina basisaka na yandi amidon. Yina bikaka mupepe kubula na zulu ya bavwale. “Beno tala Israélite, na yandi luvunu kele ve!”

216 “Ya kele Nzambi,” yandi tubaka. “Rabbi,” zola kutuba *mulongisi*, “Rabbi, wapi ntangu Nge me zaba munu? Mu me kutanaka na Nge ntete ve, mu kele nzenza na kati ya dibuundu yayi, mu me vwandaka ntete awa ve. Wapi mutindu Nge zolaka zaba munu?”

217 Yandi tubaka, “Ntete Philippe kubokila nge, ntangu nge vwandaka na yisi ya yinti, mu monaka nge.”

218 Ya vwandaka Yesu mazono. Ya kele kieleka? Kana Yandi kele mutindu mosi, Yandi kele mutindu mosi bubu yayi. Beto baka yinsi yankaka ya bantu. Ya vwandaka na yinsi ya bantu. . .

219 Kuna vwandaka kaka na bayinsi tatu ya bantu, mpe ya kele Cham, bantu ya Japhet mpe bantu ya Japhet. Beno me mona? Ya kele kieleka. Ya kele kisika, na Pantekote, kisika Nsangu ya mbote kwendaka na ba-Juif, na manima na ba-Samaritain, mpe na manima na Bantu ya makanda. Beno me mona, Cham, Sem, mpe bantu ya Japhet, kele—kele bayinsi tatu. Ntangu yayi, ya kele na bayinsi zole ya bawu yina ke na kuvingila Mesiya; beto Bantu ya makanda ve. Beto vwandaka na nkawa na mukongo ya beto, beto vwandaka mimpani, na kusambilaka biteki; kasi ve—ve Cham mpe Sem.

²²⁰ Ntangu yayi, ya kele na mosi yankaka ntangu yayi, yinsi yankaka yina vwandaka ba-Samaritain, yina vwandaka ba-Juif mosi na ndambu mpe Bantu ya makanda, yina salamaka na nzila ya makwela ya disumu ya Koré kuna, mpe bawu kwendaka. Mpe bawu kwikilaka na Nzambi, bawu vwandaka sosa Mesiya. Na yawu Yesu kwendaka, ke kukitalisa Yandi mosi na ntwala ya bawu. Yandi kwisaka na ba-Juif, Bantu ya Yandi, kasi Yandi vwandaka na nsatu ya kuluta na Samarie. Santu Jean 4, beno me tangaka yawu ntete? Mpe Yandi vwandaka na nsatu ya kuluta na Samarie. Na yawu Yandi kwizaka na mbanza ya Sychar, na yawu Yandi fidisaka kaka bilandi ya Yandi samu na kusumba mwa madia. Mpe na yina bawu kwendaka. . .

²²¹ Kana beno vwandaka ntete kuna, ya kele tablo mosi ya nene, dibulu ya masa, ya kele na pompe ya mbanza, mutindu, kisika ba bikaka masa kubasika. Beno zaba, bakento ke kwizaka mpe ke baka kitekuni mpe ke kulumusa kantini, ba ke tekuna masa, ba ke tula yawu na zulu ya yintu ya bawu. Mpe ntangu yayi bakento ya luzingu ya yimbi, bakento ya yimbi, bawu lendaka kwisa ve na bakento ya mbote. Ba vwandaka ve na bimbvuka kintwadi na bilumbu yina. Kento vwandaka yimbi, yandi bikanaka na kimvuka ya yandi mosi. Bubu yayi ve; bawu nyonso kele kintwadi, kasi bawu kaka. . . kasi bawu, ya kele kaka mutindu kubaka na kati-kati ya diki, beno ke sala yawu nyonso nsemo ya mbwaki, beno me mona. Na yawu kuna, bawu, na yawu yayi kufuluka. . .

²²² Kento ya luzingu ya yimbi ke basika kuna, pene ya ngunga kumi na mosi na ndambu to makumi yiya na tanu, pene ya ntangu yayi ya kilumbu, yandi basikaka kuna samu na kubaka kantini ya masa. Mpe yandi bikaka. . . tulaka. . . Mu lendaka mona yandi kutula bandobo ya ntama mpe manivelle, bikaka yawu kuluka na kati ya dibulu ya masa, samu na kubaka kantini ya masa. Mpe kaka na ntangu yina yandi bandaka na kutubila yawu, yandi kuwaka muntu mosi kutuba, “Kento, natina Munu maza ya kunwa.” Mpe yandi talaka kuna mpe ya vwandaka na Juif. Ntangu yayi, ba vwandaka ve na ngwisani mosi na yankaka.

²²³ Bakala ya bamvula ya kati-kati, Yandi vwandaka pene ya makumi tatu. Kasi Biblia ke tuba ti Yandi talaka makumi tanu, beno zaba yawu. Yandi tubaka, “Nge ke tuba ti Nge monaka Abraham, mpe Nge kele ve bakala na zulu ya bamvula makumi tanu.” Yandi vwandaka kaka na bamvula makumi tatu. Beno me mona? Yandi tubaka. . . Mu banza ti ministere ya Yandi lembisaka Yandi mwa fioti. Na yawu yandi tubaka, “Nge ke tuba ti Nge monaka Abraham, ntangu yayi beto zaba ti Nge kele na mpeve ya yimbi.”

²²⁴ Yandi tubaka, “Ntete Abraham kuvwanda, MU KELE.” Beno me mona, Yandi kele Nzambi ya Abraham. Kieleka, Yandi vwandaka. Yandi tubaka, “Ntete Abraham kuvwanda, MU KELE.” Kieleka.

225 Mpe ntangu yayi, Yandi me vwanda kuna na dibulu ya masa, Yandi tubaka, “Kento, natina Munu masa ya kunwa.”

226 Yandi tubaka, “Ya kele kikalulu ve. Beto kele na nkabwani awa.” Mutindu bawu vwanda sadilaka na Sude, na bantu ya ndombe mpe mpembe, beno me mona. Yandi tubaka, “Beto kele na nkabwani awa. Ya kele kikalulu ve samu na Nge na kulomba munu, Nge (Juif) lomba munu (kento ya Samarie) samu na kuzwa lemvo, kima nyonso. Beto ke na ngwisani ve na mosi na yankaka.” Yandi vwandaka kento mosi ya kindumba, beno zaba. Na yina, mu banza mwa kento mosi ya kitoko. Mpe yandi vwandaka ya kutelama kuna, mu banza bansuki ya yandi nionso ya kunionga me kulumuka na kizizi ya yandi, beno zaba, mpe yandi vwandaka kuna mpimpa ya muvimba. Mpe—mpe na yina yandi tubaka, mpe yandi tubaka, “Ya kele kikalulu ve samu na Nge na kulomba munu, kento ya Samarie, mutindu yina.”

227 Yandi tubaka, “Kento, kana nge zabaka Nani vwandaka zonza na nge, mpe nge zabaka Nani nge vwandaka zonza, nge ke lomba Munu masa.” Yina kele Mesiya mazono, beno me mona. “Nge ke lomba Munu masa, Mu ke pesa nge masa nge ke kwisa awa ve samu na kubaka yawu.”

228 “Kasi,” yandi tubaka, “dibulu ya maza kele yinda, mpe Nge kele na kima ve samu na kutekuna na yawu, wapi mutindu nge ke pesa munu maza?” Yandi tubaka, “Tata ya beto Jacob!” Beno me mona, yandi vwandaka Samaritaine, kasi yandi bokilaka tata ya yandi, mpe. “Tata ya beto, Jacob kunwaka na dibulu ya maza yayi, bibulu ya yandi, dibuta ya yandi. Mpe kasi Nge ke tuba ti Nge kele na maza ya kulutula yayi?” Yandi tubaka, “Nge ke tuba ‘kusambila,’ Nge kele Juif, Nge ke tuba ‘Jérusalem.’ Beto ke tuba na mongo yayi.”

229 Yandi tubaka, “Kento, ntangu ke kwisa, mpe yayi kele ntangu, ti ntangu misambidi ya kieleka ke sambila Nzambi na Kimpeve, samu ti Nzambi kele Mpeve.” Beno me mona? “Tata ke sosaka misambidi ya mutindu yina.”

Yinki Yandi vwandaka sala? Yandi vwandaka solula na yandi, samu na kukutana na mpeve ya yandi. Beno me mona? Ntangu yayi, beno bambuka moyo, Yandi fwana vwanda Mesiya, na ntwala ya ba-Samaritain yayi. Mpe na mbala mosi Yandi monaka mpasi ya yandi. Bantu yikwa zaba yinki ya vwandaka? Kieleka. Yandi vwandaka zinga na bakala ya yandi ya sambanu.

Na yawu, beno me mona, ya kele yimbi ntangu beno kele na bakala ya moyo, ya kele na kati, mpe—mpe nyonso yina, mpe kubasika. Mpe kaka samu na konso dyambu yina, kubasisa kento mosi, mpe kukwela yandi, mpe kukwenda kukwela yankaka, kukwela yankaka, kukwela yankaka, beno zolaka sala yawu ve. Na yawu Yandi tubaka, yandi. . .

Kuna yandi, mu banza ti yandi vwandaka zinga kukondwa kukwela bawu. Yandi zolaka kwelana ata mbala mosi ve na

bawu. Ya lendaka vwanda ti yandi me kwelanaka ata fioti ve. Na yina yandi tubaka bima yayi nionso ya yimbi, beno zaba, yandi salaka bima yayi nionso ya yimbi.

Na yawu kuna na ntangu yina Yandi vwandaka ya kutelama kuna, vwandaka tala yandi mutindu *yina*, Yandi tubaka, “Kwenda, natina Munu maza ya kunwa.” Mpe yandi tubaka . . . “Kasi kana nge zabaka Nani nge vwandaka tuba, nge zolaka lomba Munu masa. Mu ke nata nge maza nge ke kwisa ve . . . Mu ke pesa nge maza, nge ke kwisa awa ve samu na kunwa.” Na yina Yandi tubaka, “Kwenda, baka bakala ya nge mpe kwisa awa.”

Yandi tubaka, “Tata, mu ke na bakala ve.”

“Oh,” Yandi tubaka, “nge me tuba mbote. Nge vwandaka na babakala tanu, mpe yina kele na nge ntangu yayi kele bakala ya nge ve. Na kati ya yawu nge tubaka mbote.” Yandi, beno kuwa, kento yina . . . Ntangu yayi ntangu . . .

Yinki ba-Juif bokilaka Yandi ntangu bawu monaka Yandi kusala yawu? Bawu zabaka ti Yandi vwandaka Mesiya? Ve. Yinki bawu tubaka ti Yandi vwandaka? “Béelzébul, nganga-nkisi,” bawu tubaka, “ngolo yina vwandaka Béelzébul.” Mpe bawu bokilaka Mpeve ya Nzambi, yina vwandaka sala kuswasikisa mabanza yina, “kima ya yimbi.”

Yandi tubaka, “Nge ke tuba dyambu na Munu, Mu ke lemvokila nge. Kasi kilumbu mosi Mpeve-Santu ke kwisa, samu na kusala kima mutindu mosi; mpe nge ke tuba ndinga mosi samu na Yawu, ba ke lemvokila nge ata fioti ve.”

²³⁰ Na yawu beno me mona kisika beto kele bubu yayi, kana ya salamaka mutindu yina bubu yayi. “Ndinga mosi ke telemina Yawu, ba ke lemvokila bawu ata fioti ve, to na yinza yayi to na yinza yina ke kwisa.” Na yawu beno me mona yina nsungi yayi me sala. Ntangu yayi beno banza na yawu. Beno banza na ngolo. Beno teza Bampova yayi ya nene.

²³¹ Ntangu yayi, ba-Juif tubaka, “Muntu yayi ke salaka bima yayi na nzila ya Béelzébul. Yandi kele diabulu, nganga-nkisi.” Beto zaba ti nganga-nkisi kele dyabulu. Na yawu yandi tubaka, “Muntu yayi kele nganga-nkisi.”

²³² Na yawu Yandi lemvokilaka bawu samu na kubokilaka Yandi nganga-nkisi. Kasi na manima Yandi kufwaka mpe Mpeve-Santu vutukaka, kuna ya vwandaka luswaswanu. Beno me mona? Mpe yina, ya kele samu na nsungi ya Bantu ya makanda. Ntangu yayi beno tala.

Ntangu yayi, ba-Juif monaka yawu yimeni, fundisaka yawu.

²³³ Bantu ya Samarie kuzwaka yawu, mpe yandi tubaka, “Tata, mu ke mona ti Nge kele Profete.” Yinki nge ke sala na yawu, Samaritain? “Mu ke mona ti Nge kele Profete. Beto zaba ti ntangu Mesiya ke kwiza, Yandi ke tuba na beto bima yayi.” Beno me mona, bawu zabaka Mesiya, Nani Yandi zolaka vwanda.

Yandi tubaka, “Beto zaba ti Mesiya, yina ba me bokila Klisto, ntangu Yandi ke kwisa Yandi ke tuba na beto bima yayi. Kasi Nani Nge kele? Nge kele profete ya Yandi?”

Yandi tubaka, “Mu kele Yandi. Mu kele Yandi.”

²³⁴ Mpe na zulu ya yayi! Ntangu yayi beno kuwa. Na zulu ya yayi, yandi bikaka dibungu ya yandi mpe kwendaka mbangu na kati ya mbanza, mpe yandi kwisaka kutuba na babakala na kati ya babala-bala, na kukimaka mbangu na kati ya mbanza, yandi tubaka, “Beno kwisa, beno tala Muntu Yina me tuba na munu mambu yina mu salaka! Yayi kele Mesiya ve?” Mpe Biblia ke tuba ti mbanza nyonso kwikilaka na Yandi samu ti kento tubaka yayi, ti Yandi tubaka na bawu, samu ti Yandi vwandaka Mesiya.

²³⁵ Ntangu yayi, kana yina vwandaka kidimbu ya Mesiya mazono, mpe Yandi kele mutindu mosi mazono, bubu yayi, mpe kukonda nsuka, ya ke vwanda kidimbu mosi bubu yayi. Ya kieleka? Bantu yikwa ke wisana na zulu ya yawu? Kieleka, yinga, ya kele mutindu mosi. Mbote mingi.

²³⁶ Ntangu yayi, ya ke vwanda na muntu ya luswaswanu? Ve. Yandi zolaka, Yandi bokaka, Yandi dilaka, Yandi lalaka, Yandi kwendaka na ntoto ya kuyuma, kwendaka kuloba, salaka kaka mutindu muntu yankaka. Yandi vwandaka kaka muntu, beno me mona, kasi dyaka Yandi vwandaka Mesiya ya kupakulama.

²³⁷ Ntangu yayi, ntangu yayi beto ke bambuka moyo kuna na kati ya Biblia, yina ke tuba na beto ntama, kisika beto ke kwenda na Masonuku mingi mpe ke lakisa ti Biblia ke tuba ti ya ke vwanda “Kilumbu yina ke vwanda ve mpimpa to kilumbu,” kaka kilumbu ya mpasi, ba-organisation mpe dibuundu, mpe mingi samu na kuzwa mpulusu, “kasi na ntangu ya nkokila ya ke vwanda na Nsemo.” Bantu yikwa me tangaka ntete yawu na kati ya Biblia? Kieleka. Beno me mona?

²³⁸ Ntangu yayi, na nzonzolo yankaka, mwini ke basikaka na Este mpe ke lalaka na Weste. Mwini mosi ke basikaka na Este, ke lalaka na Weste. Mbote, ntangu Mwana ya Nzambi, M-w-a-n-a, vumbukaka na esete, na zulu ya bantu ya Esete. Civilisation ke zyetaka, ke zyetaka na mwini, mpe beto kele na Côte Ouest ntangu yayi. Kana beno kwenda na yinza, beno kwenda na Chine, dyaka na Esete. Na yawu kuna Mwana mosi yina lezimaka na Esete kele ntangu yayi ke na kulezima na Wesete, na mbotika mosi ya Mpeve-Santu, bidimbu mosi, mambu ya ngitukulu mosi, Mesiya mosi. Ya kele kieleka? “Ya ke vwanda na Nsemo na ntangu ya nkokila, nzila ya Nkembo kieleka beno ke mona.” Ya kele kieleka.

²³⁹ Beto kele na nkokila, Nsemo ya nkokila. Mwini ke kulumuka. Mesiya kele na kati-kati ya beto. Mwana ya Nzambi, na mutindu ya Mpeve-Santu, kele na kati-kati ya beto. Beno ke kwikila yawu? [Dibuundu me tuba, “Amen.”—Mu.] Nge ke kwikila ti mu kele kisadi ya Yandi? [“Amen.”] Nge ke kwikila ti yina mu ke

tuba na nge kele Kieleka? ["Amen."] Beno ke kwikila disolo ya Wanzio yina mazono na suka, mazusi na suka? ["Amen."] Nge ke kwikila yawu? ["Amen."] Na yina bika ti Nzambi ya Mazulu, bika ti Nzambi yina monikaka na munu na mutindu ya mukyama yina, bika Yandi kutuba. Mpe bika ti nzutu ya munu kupesama na Yandi, moyo ya munu, mpeve, mpe mabanza, kupesama na nkembo ya Yandi. Ntangu mu vwandaka sosa mpadi yina ya nsuka, mpe mu zabaka ti ya ke vwanda nsuka, ya vwandaka kaka na manima baminuti tatu tii ngunga kumi, mpe mu tubaka ti ya ke vwanda na ngunga ya kumi.

Beno zaba, Yandi tubaka, "Tuba yina nge ke sala. Ya ke vwanda mutindu yina." Ata mbala mosi ve ti Yandi me kondwaka yawu, ata nyonso yina. "Tuba kaka yina nge zola."

Kasi ntangu ya nana yina kusalamaka, vwandaka na zulu ya mwa kento. Yandi kele ya kuvwanda na manima kuna ntangu yayi, mu banza. Mu ke mona Mpangi Wright yina kele ya kuvwanda awa. Hattie Wright, ntangu yandi lombaka yandi bitini zole- . . . Yandi yayi, kaka kuna ntangu yayi. Samu na mpulusu ya bana ya yandi zole, (mutindu yina ve?), vwandaka kieleka ya kutelemina yawu. Mu tubaka, "Mu ke pesa nge bana ya nge, na Nkumbu ya Yesu Klisto." Bawu kubwaka kuna na makulu ya yandi.

²⁴⁰ Ed Daulton, Baptiste yina me vwanda awa, yina me katuka kuna na Kentucky, yina me vwanda awa. Bana yikwa kele na nge, Ed? Bana kumi na zole. Yandi vwandaka kaka ya kutelama awa, yandi lombaka bana ya yandi. Mu basikaka na kivinga. Ed kwisaka diaka na munu; mu tubaka, "Ed."

Mpeve-Santu vwandaka na zulu ya munu, tubaka, "Pesa yawu na yandi. Pesa yandi."

²⁴¹ Mu tubaka, "Mu ke pesa nge bana ya nge." Bawu nionso, me kuzwa mpulusu mpe me baka mbotika. Ya vwandaka na ntwenya ya yandi kuna ya kuvwanda na yinzo, ke vingila, ke boka, yandi kuzwaka mpulusu kubanda ntangu yandi vwandaka na zulu awa. Mpangi-bakala yayi ya Baptiste me katuka kuna . . . Oh, oh, mutindu Yandi kele mbote ntangu Yandi ke zonza!

²⁴² Mu ke lomba Yandi ntangu yayi, samu na nkembo ya Yandi, samu na kukitalisa Yandi mosi, ti Yandi kele Klisto, ti mu ke tuba Kieleka.

²⁴³ Ntangu yayi, ti muntu ya kukondwa lukwikilu zolaka vwanda na ata nzila ve ya kutina. Mu zola bantu yina kele awa, yina kele ya kubela mpe kele na nsatu, kele na nsatu ya Nzambi, yina mu zaba ve, banzenza na kati ya beto, bantu yina mu zaba ve, yina kele awa, mpe beno kele na nsatu ya Nzambi, beno telemisa maboko ya beno. Bantu bisika nionso. Ti, mbote mingi, kaka na kutala bisika nionso, mu banza. Bantu yina mu zaba ve. Kana mu bokila muntu yina zaba, ti mu zaba mpe beno zaba munu, mpe—mpe beto me zaba mosi na yankaka, beno tuba kima

mosi ve, beno vwanda kaka swi. Kana Yandi kele Mwana ya Nzambi, yina Yandi kele, mpe Nsangu ya munu kele kieleka, mpe Wanzio yango. . .

²⁴⁴ Ntangu ya vwandaka baminuti tatu tii ngunga kumi, mu tubaka, “O Nzambi, Yina monikaka na munu mwa ntangu fyoti me luta na mukyama yango, ya kele baminuti tatu. Mu ke mona ata mpadi ve. Ya kele baminuti tatu, Nge fwana nata mosi na munu.” Mpe Nzambi na kuvwandaka Zuzi ya munu, mu ke tuba yawu kaka na diboko ya munu na zulu ya Biblia. Beno kwikila ve na kuzenga ndefi, Biblia ke tuba yawu ve; Ya ke tuba yawu ve. Kasi Nzambi kele Zuzi ya munu, mpadi ke kulumuka kaka na yinti mpe ke vwanda kaka kieleka. Yandi me kubwaka yawu ata fioti ve; Yandi me salaka yawu ata fioti ve. Mingi na kati ya bawu kele awa samu na kuzaba bima yina. Mu zaba ti Yandi, Nzambi mosi yango, kele awa.

²⁴⁵ Ya kele na bakalati ya bisambu yina ba me kabula. Mu zola yawu ve. Beto ke bika ba sambila bawu na mwa ntangu fioti, ba ke kwisa na ndonga. Mu zola ve bantu yina kele—yina kele awa, to nionso yina.

²⁴⁶ Mu zola banzenza. Mu zola bantu yina me zaba munu ve. Mu zola ti beno simba mabanza ya beno, mu zola ti beno banza mpe sambila, mpe na kutubaka, “Nzambi, muntu yina zaba munu ve.”

²⁴⁷ Mpe kilumbu mosi kento mosi ya ntwenia pasulaka nzila na kati ya nkonga ya bantu. Yandi vwandaka basika menga. Mpe yandi tubaka. . .

²⁴⁸ Ntangu bawu nyonso vwandaka tuba, “Awa Yandi kele! Beno tala Yandi! Ya kele na muntu ya Galilée yango,” nyonso yina. Barabbin yayi nyonso mpe nyonso yina me telema kuna, ke tuba, “Rabbi, beto ke sosa kidimbu ya Nge,” mpe nyonso yina mutindu yina.

²⁴⁹ Mwa kento yayi tubaka, “Mu ke kwikila ti Yandi kele Mwana ya Nzambi. Mpe mu ke kwikila ti kana mu lenda simba kaka nsongi ya lele ya Yandi, mu ke beluka.” Bantu yikwa zaba yawu? Yandi simbaka Yandi.

²⁵⁰ Ve ti Yandi lendaka kuwa; kasi Yandi telemaka mpe balukaka, yandi tubaka, “Nani me simba Munu? Muntu mosi me simba Munu.” Bantu nyonso vwandaka swi. Yandi tubaka, “Muntu mosi simbaka Munu.” Yandi tubaka, “Nani me simba Munu?”

²⁵¹ Mpe Yandi talaka na nziunga tii kuna Yandi monaka mwa kento yango. Yandi lendaka ve kubumbama yandi mosi. Ya lendaka ve kumona yandi. Yandi monaka yandi mpe tubaka, “Lukwikilu ya nge me vulusa nge.” Yandi tubaka, tubaka na yandi, kubasika ya menga ya yandi vulukaka sa- . . . ya kwikama, samu ti yandi kwikilaka, mpe lukwikilu ya yandi simbaka lele ya Yandi. Beno ke kwikila yawu? Mbote mingi.

²⁵² Ntangu yayi, Yandi kele Nganga-Nzambi ya Ntete bubu yayi yina kele ya kuvwanda na diboko ya kibakala ya Nzambi, ke na kusambilaka na zula ya funguna ya beto? Biblia ke tuba ti Yandi kele Nganga-Nzambi ya Ntete yina lenda simbama na bansatu ya bimbevo ya beto? Ya kieleka? Mbote mingi, kana beno kele ya kubela, beno banda na kusambila, beno tuba, “Mfumu Nzambi, mu me kuwa kaka Nsangu. Mu—mu zaba ve bakala yayi. Mu kele—mu kele awa na tabernacle. Mu ke kwisaka awa ve, yayi kele yinzo-Nzambi ya munu ve. Mu me katuka kisika yankaka. Mu me katuka na ngaanda ya mbanza, mu me katuka kisika yankaka. Mu zaba ve bakala yango. Kasi yandi ke sala yawu, ya ke monana ti ya kele kieleka mingi ti ya kele Nge, mpe me tuba ti Nge me monika na yandi, ti Nsangu ya yandi vwandaka ya kusungama, mpe mutindu Nge ke salaka bima yayi. Ntangu yayi, mu zaba ve muntu, kasi mu zaba Nge. Na yawu kana yandi me kukipesa yandi mosi na Nge, mpe Nge ke na kusadila nzutu ya yandi samu na kuzonza Bandinga ya Nge Mosi, ti yandi zonza na munu. Bika mu simba lele ya Nge, Mfumu.” Mpe beno tala kana Yandi sala yawu to ve! Beno mona kana Yandi kele Nzambi.

²⁵³ Kana Yandi kele kaka Nzambi, Yandi lenda sadila bikoba ya munu samu na kuzonza bampova mosi yina Yandi ke sala, samu ti Yandi kele ve na bikoba kasi ya munu mpe ya beno. Yandi kele na ata meso ve kasi ya beto. Na yawu Yandi ke kulumuka mpe ke sala Dibuundu ya Yandi na nzila ya nzutu ya beto. Beno ke kwikila yawu? Yandi ke sala, Yandi mosi! Ya kele yina Yandi tubaka. “Bisalu yina Mu ke sala, beno ke sala mutindu mosi.” Ya kele kieleka? “Bisalu mosi, beno ke sala.” Yina vwandaka bisalu Yandi salaka, samu na kusiamisa ti Yandi vwandaka Mesiya. Ntangu yayi, kana Yandi kele Mesiya, mpe Yandi kele, na yina, yina kele kieleka, na yina Yandi ke sala bisalu mutindu mosi malu-malu yayi, na nzila ya Dibuundu ya Yandi, yina Yandi salaka kuna. Yina ke siamisa ti ya kele kieleka, ata nyonso ya ba-denomination ya beno. Oh, alleluia!

²⁵⁴ Mpangi Kidd ya kiboba mpe Mpangi-kento Kidd me vwanda awa, bawu zole, mpe bawu kele na bamvula makumi nana, ke longa na ntuala mu butuka. Awa yandi vwandaka ya kulala na suka yina, vwanda kufwa, na cancer, pene ya bamvula zole me luta, ke pasula na nzila ya prostate ya yandi; kuna na Ohio. Mu vwandaka bankundi ya munu ya luzolo mingi. Mpangi-kento Kidd bokilaka munu, yandi tubaka, “Billy, nge ke sala mbote na kusala nswalu. Yandi ke na kufwa, na ntangu yayi.” Mpe Billy mpe munu vwandaka zola kuyoka ditoma ya munu ya okazio, samu na kumata kuna.

²⁵⁵ Ntangu mu kumaka kuna na kivinga, kaka na ntangu mu kumaka kuna, Mpeve-Santu tubaka, “**MUTINDU ME TUBA MFUMU.**”

²⁵⁶ Yandi me telama kuna, mbangi samu na nkembo ya Nzambi, ata dokotolo ya yandi kele ya kudasuka. Ya kele kaka, Yandi kele

Nzambi! Mu lenda sala yawu? Ve, tata! Bandinga ya munu kele dyaka ve kulutila muntu nyonso. Kasi ya vwandaka MUTINDU ME TUBA MFUMU! Amen.

²⁵⁷ Bamvula me luta, kuna na kati ya miongo ya Kentucky, mwa Dibuuundu mosi ya ntama ya Nzambi, to bayankaka na kati ya bawu, na kumataka mpe kukulumuka na biwanda, na kubulaka masangu na kitini ya yinti mosi, na mama ya kiboba Kidd, samu na kudisa nkonga ya bana; kusukula basini, samu na kutinda bakala ya yandi na bilanga.

²⁵⁸ Mpe bawu yayi awa na kati ya bamvula makumi nana ya bawu, ya kuvwanda awa bubu yayi, ke sepela na Nsangu ya mbote ya Yesu Klisto, na kunataka ditoma nkama mosi mpe kima mosi ya bakilometele na Lumingu na suka, konso Lumingu mu ke longa awa, kana bawu lenda kuwa yawu. Kieleka, beto ke fidisa bawu balubokilu, ba ke zola kukwisa. Sakumuna mwa bantima ya bawu ya ntama. Ya kieleka. Mu zola ti muntu nionso awa kupesa bawu mbote na suka yayi, kana bawu lenda, sakumuna bawu.

Ntangu yayi beno sambila.

²⁵⁹ Oh, mu kele na kyese mingi na kuzaba ti Yandi kele Nzambi. Wapi mutindu ya kuwa! Beno ke tuba, “Samu na yinki nge ke sakana, Mpangi Branham?” Mu ke vingila Yandi. Ya kele. . . Mu vwandaka longa. Yayi kele kupakulama yankaka.

²⁶⁰ Mpe kana Yandi ke kwisa mpe ke sala yawu, bantu yikwa na kati awa, yina kele bambevo, ke ndima Yandi mutindu Munganga ya bawu? Beno telemisa kaka maboko ya beno, bambevo nionso, kana Yandi ke—kana Yandi ke sala yawu. Beno telemisa maboko ya beno, muntu nionso yina kele ya kubela, yina lenda mona Mesiya yina, Klisto, kele na kati-kati ya bantu, ke na tubaka.

²⁶¹ Beno sambila. Beno kwikila. Mu ke kumipesa na lweka yayi ya yinzo. Mu kele na bantu mingi ke sambilaka. Mu ke mona kupakulama.

²⁶² Beno tala. Bantu yikwa me kuwaka yawu, Dikunzi ya Tiya yina kuna, ti science me namika na Washington, DC? Beno zaba yawu. Beno tala foto ya Yawu, kaka awa, Dikunzi mosi ya Tiya yina twadisaka Moise. Ntangu mpe science tubaka, “Kilumbu mosi ya ke vwanda na zulu ya mitalaka ya magazini na ba-centime kumi. Kivangu mosi kaka ya kulutila kimpeve yina ba me bakaka ntete ve foto.”

²⁶³ Wanzio mosi yango kele kaka awa na chaire malu-malu yayi. Beno sosa yawu. Mu ke tula ntembe na beno na kukwikila yawu. Beno bantu ya ngaanda, beno kwikila.

²⁶⁴ Ntangu yayi mu fwana tala kaka kisika mu ke mona Yawu ke kwenda. Beno vwanda na buzitu, muntu nyonso, na Mvwandulu ya Yandi, Boma yina.

265 Mu ke mona muntu. Yawu yayi. Yandi me vwanda na diboko ya munu ya kikento, kaka awa na manima na nsongi. Yandi ke na kimbevo ya sinusite mpe mpasi ya estomac. Nge ke kwikila na ntima ya nge ya muvimba. Vwanda nzenza samu na munu. Ya kele Tata Wells. Ya kele yina kele nkumbu ya nge, Tata Wells. Nge kele awa ve. Beno kele kisika ba ke bokilaka Aurora, na Illinois. Ya kele kieleka. Ya kele kieleka? Mu kele nzenza samu na nge. Kana ya kele kieleka, telemisa maboko ya nge. Telema. Yesu Klisto me belusa nge.

Nge ke kwikila ntangu yayi? “Kana nge lenda kwikila.”

266 Ntangu yayi, kuna, muntu yina, mu me monaka ntete ve na luzingu ya munu, mpe nzenza ya kulunga na kati-kati ya beto. Yandi kele ya etat yankaka. Mpe Mpeve-Santu, ntangu yayi, nyonso yina Yawu tubaka na yandi, mu ke zaba ve tii mu ke kuzwa bande yina. Ya kele kupakulama yina ke kwiza na zulu ya beno. Kasi muntu zaba.

267 Yinki ba tubaka na beno kele kieleka. Ya kele kieleka, tata? Yinga. Beto kele banzenza. Ya kele, ti yandi kuvwanda mbangi ya yandi mosi.

Nani salaka yawu? Mesiya, Klisto.

268 Awa kele na mama mosi ya kuvwanda kaka na manima awa, na kati-kati ya bantu, kaka awa. Beno me mona Nsemo yina na zulu ya yandi? Yandi ke na kimbevo ya mpusu. Mama Pitman, nge me katuka na Owensboro. Kana nge kele nzenza, pepa diboko ya nge. Bima yina kele kieleka? Pepa diboko ya nge. Nzambi belusaka nge. Mu me monaka ntete ve kento yayi, kaka na vision.

269 Ti beno fwana zaba, kaka kuna na lweka ya nge kele kento mosi na nkumbu ya Ellis, Mama Ellis, kento mosi ya ntwenya. Yandi kele na kimbevo ya bakento. Yandi kele nzenza mpe. Kana ya kele kieleka, pepa diboko ya nge. Ya kele mama ya nge yina kele ya kuvwanda pene-pene ya nge kuna? Ya kele na mama mosi ya kuvwanda kuna, yina ke na kutalaka mpasi na boma, boma ya kidi-kidi na zulu ya yandi. Kana ya kele kieleka, telemisa diboko ya nge, mama. Mbote mingi. Boma me kwenda. Beno lenda vutuka na yinzo, beluka. Mu ke tula ntembe na beno na kukwikila.

270 Kuna na manima, na nsongi, kuna na manima, bakala mosi ya Minnesota, na mpasi ya mukongo. Nkumbu ya nge kele Tata Carson. Telema. Mpasi ya nge ya mukongo me kwenda. Yesu Klisto me belusa nge.

271 Kaka na manima awa, mama mosi ya kubela. Yandi me katuka na ngaanda ya mbanza. Yandi me katuka kisika ba ke bokilaka Kisanga ya Bleu. Yandi kele na mpasi ya ntima. Ya kele pene-pene ya Chicago. Mama Braidon, telema, ndima kubeluka ya nge. Vutuka na yinzo mpe beluka, na Nkumbu ya Yesu Klisto.

272 Beno ke kwikila? Yinki diambu yayi? Beno zaba ti ya kele Mesiya? Wapi mutindu muntu me zaba?

273 Bantu yayi nionso ba me bokila, ntama mingi ve, mpe zaba ti mu zaba kima mosi ve samu na beno, beno telemisa maboko ya beno, beno nionso bantu yina ba me bokila, bisika nionso. Beno me mona kuna?

274 Ya kele na muntu na manima ya munu, yina ke sambila, kuna na manima, na kati ya kivinga. Ya kele mpangi mosi ya ntwenya, na kidi-kidi, ke na kusambilaka samu na cousin mosi kuna na Kansas, yina me kuzwa cancer. Beno kwisa na ntwala na kielo. Beno vwanda na lukwikilu na Nzambi. Beno ke kwikila?

275 Elmer, yina vwandaka mwa kuvukana na nge. Mu ke mona papa ya nge ya kuvwanda kuna, kento ya yandi. Hypertension. Kana nge ke kwikila, Nzambi ke belusa nge. Mu zaba ve. Ya kele kieleka. Mutindu yina ve? Beno ke kwikila na ntima ya beno ya muvimba.

276 Nge ke kwikila? Nge ke kwikila ti Yesu Klisto kele Mesiya? Nge ke kwikila ti Mvwandulu ya Yandi kele awa? Beno bambuka moyo, ntangu kento mosi simbaka lele ya Yesu, Yandi lembaka. Ngolo, ngolo, katukaka na Yandi. Mu me kwenda kaka ntangu yayi. Beno me kwikila?

Na yina beto kulumusa bayintu ya beto na mwa ntangu fioti.

277 O Yesu, Mesiya ya Nzambi, Nge me kuma pene-pene. Bantu me zaba ti Nge kele Mwana ya Nzambi, ti Nge kele awa ntangu yayi. Bidimbu ya nge ya nene mpe mambu ya ngitukulu me siamisama. Sakumuna bawu, Tata. Sakumuna bawu, mu ke sambila. Bika bawu kwikila ntangu yayi, na ntima ya bawu ya muvimba, ti Nge, Mesiya, kele Yandi yina me telema awa. Muntu ve lenda sala yawu. Ya kele mpasi na kimuntu, Mfumu. Kimangu, na kumona ngolo ya Mesiya kukwiza na kisika mosi ya fyoti, ya kulemvuka mutindu yayi, samu ti Nge silaka yawu, Mfumu. Samu ti, lemvo ya Nge kele awa samu na kupesa beto lemvo. Samu ti ya kele nsilulu ya Nge na kusala yawu, Nge me sala yawu. Beto ke mona ti Nge ke bika ve bantu ya Nge.

278 Ntangu yayi, Tata Nzambi, bika ti bayina kele na bakalati ya bisambu, bawu kwisa na ndonga ya bisambu, bika ti bawu vwanda na lukwikilu ya kukwikila. O Nzambi ya Ngolo nionso, ntangu ba me tentika maboko na zulu ya bawu, bika bawu kota awa, na kuyangalala, na kubokaka, na kukumisaka Nzambi, ti bawu me beluka. Pesa yawu, Mfumu.

279 Mpe bika ti bayayi me kuzwa mpulusu, bawu zaba ti ya kele ve na binsweki na Nzambi. Nzambi ke monisa binsweki ya ntima; Yandi zaba mabanza nionso yina kele na kati ya mabanza ya beto. Pesa yawu, Tata. Beto ke lombwa yawu na Nkumbu ya Yesu Klisto. Amen.

²⁸⁰ Ntangu yayi, beno bayina kele na bakalati ya bisambu, kuna na kati ya kivinga, beno bantu pene-pene ya tabernacle, awa, bayina kele na bakalati ya bisambu, beno ke kwikila? Beno telemisa maboko ya beno. Mpe beno kwikila ti muntu lenda sala yawu ve. Yina fwana katuka na Nzambi. Beno ke kwikila ti ya kele nsilulu ya Nzambi, ti Nzambi tubaka ti Yandi ke sala yawu? [Dibuundu me tuba, "Amen."—Mu.] Mbote mingi. Na yina beno zaba ti Muntu mosi kele awa pene-pene ya muntu.

²⁸¹ Mu ke baka kaka Ndinga yayi, na ntwala ya Nzambi. Bantu yina ba zonzaka, muntu nyonso yina ya vwandaka, mu zaba bawu ve, mpe bawu zaba munu ve. Bawu kele kaka banzenza yina me kota kaka na kati ya tabernacle awa, kisika nionso bawu kele.

²⁸² Mu ke mona ba-vision na zulu ya bantu awa yina kele na tabernacle, kasi beno bika bawu swi, yinga, beno bika kaka bawu swi.

²⁸³ Bantu yango yina ba bokilaka, muntu nyonso yina beno vwandaka, ti bayankaka lendaka mona ti beno kele banzenza, beno telemisa diboko ya beno. Beno me mona? Mosi na mosi, nionso banzenza.

²⁸⁴ Kima mosi ke landila na kutindika munu. Mu ke mona mama mosi ya ndombe me monika na ntwala ya munu, ntangu nionso, kele na arthrite mpe hypertension. Yinga. Nge kele nzenza na kati-kati ya beto. Nge me katuka na Memphis, Mama Sals. Yina kele nkumbu ya nge. Mbala ya nge ya ntete awa. Nge ke kwikila na Mfumu, na ntima ya nge ya muvimba? Na yina nge lenda vutuka na yinzo mpe kuzwa mpulusu, kubeluka. Nzambi ke bakaka yawu samu na yandi.

²⁸⁵ Beno kwikila na ntima ya beno ya muvimba, beno nionso. Beno telemisa maboko ya beno ntangu yayi, beno nionso. Kwikila na bantima ya nge ya muvimba. Tula maboko ya nge na zulu ya mosi na yankaka.

Kwisa awa, Mpangi Neville. Kwisa awa, sala kisambu.

²⁸⁶ Na yina beto me kulumusa bayintu ya beto, Mpangi Neville ke sambila. 

61-0827 Nsangu Ya Lemvo
Branham Tabernacle
Jeffersonville, Indiana U.S.A.

KIKONGO-KITUBA

©2025 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutula mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutula mingi to samu na yina me tadila bisadulu, beno sonikila:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org